

1 Korint

1 ¹⁻²Anut ilon yen ak ago, ηai Pol, Jesus Kristus san aposel ηilasa wo igiag a. ηai, agod idsad teid Sostenis dam girek en an Anut san Kris midaen a Korint na amado dan sam na miganeg ipalu ya. Anut an igian go Jesus Kristus da itumanan go inanen tamolpein gun ak alasa ya. An agod tamolpein a tan fidian lo dumado dugo, idsad Tubun ak Jesus Kristus yanan lo dugudani dan dida, an sam na girek en miganeg ipalu ya. Kristus man inaned Tubun ak, agod idsad mi a.

³Anut idsad Tamad agod Tubun ak Jesus Kristus, inaned ilo panek agod ilo maror da ka dupanan a.

Pol Korint adi niηedi wo Anut ilo uyan ru ipani a

⁴ηai an niηemi wo nal fidian Anut ilo uyan ηupani da, fun dugo, Jesus Kristus log Anut ilon ipanan a. ⁵Kristus lo man Anut in dal fidian lo binawek funfun an ipanan a, an lo binawek ru afulale san, agod binawek manau amam da yak san dam aburoug binawek uraru an an ilom lo inane fute ya. ⁶Man dugo, ru a man Kristus niηen o an lulunam lo mufulale se yan nuηon igane dugo ale ya. ⁷Fun an niηen o idsad Tubun ak Jesus Kristus, fon kuai isi da wan niηen o an malam agane dugo, Urgun binawek ipanad dan lo ta katuk am da, tia geig a. ⁸In an dabi ipanan pe atur sakar yaup saen wadan idu wa, an lo idsad Tubun ak Jesus Kristus san nal idu wan lo in an mel ta niηen o ru ta ipanan na wa. ⁹Anut pempem inanen ru iganuri da. In an igian go inanen Nanun, Jesus Kristus idsad Tubun ak da atumanig nug turan igo won ator da. Amaiak niηen o in dugo ibol dan ate mi ago igane wa.

Korint midaen ilon lo biatitek yen da

¹⁰ηai teig taog, idsad Tubun en Jesus Kristus yanan lo ηusumianan da, an fidian mi ilom kisaek dop an lulunam lo biatitek ta yen na wa. ηai ilog ibol dak, an fidian mi ilom atumani, agod ananem ilo sou dam kisaek a. ¹¹Man dugo, Kloe san tamolpein ηaisag na dupalug, an lulunam lo nug paek kagin yen dan dubol go ηalor a. ¹²ηai ago ηabol an san fun man igo ya. An lulunam lo ta ibol, “ηai Pol san,” ta ibol, “ηai Apolos san,” ta ibol, “ηai Sifas san,” agog ta ibol, “ηai Kristus san.”

¹³Ak dugo, Kristus tinin gilefutek go sensen dien di? Tia, nai Pol, an ninemi wo aigim fo namat i? Tia, nai yanag lo suguek dupanan i? ¹⁴Ijai Anut ilo uyan nupani da, man dugo, nai tamolpein tata nufulanai man tia ya, nek Krispas in Gaias da mi a. ¹⁵An lo man talpein ta nai yanag lo nusugui ak ago ibol san tia ya. ¹⁶Rumok, nai Stefanas san warou inanen ab lo dumado dan nusuguai a, ak gug an patun fo taidam nusuguai ak ago ilog isou man tia ya. ¹⁷Man dugo, nai tamolpein nusuguai o Kristus idinag go ta nupalu na ya. Tia, in nai bilalun uyan ak nabol ilasa wo idinag go nupalu ya. Agod ru a nabol ilasa na yan tamol sad kankan milaen ak lo ta ilasa na ya, agod kududod lo ru bulbal ak nai dida ta minijen na ya. Ata wo? Ru a Kristus san aigim ninen o tabol ilasa dan man dabai anda ya, kabelan ru sen ak nabol ilasa dan lo aigim san dabai an nunon igane ilasa san tia banau.

Kristus in man Anut san dabai agod kankan milaen a

¹⁸Man dugo, tamolpein ensauta a dideg diau dan in ilod lo man, aigim san njen an ru nijeo igo won a. Ak man tamolpein ensauta a Anut patud ipasi wo urat igane dan, insad ilo sou lo man, aigim san njen an Anut san dabai mok. Agod id man nek tamolpein ama ya. ¹⁹Ata wo? Awak aban ta Anut san buk lo yak igo ibol,

“Ijai tamol a sad kankan milaen an inaned manau daon nupani wa, agod kaman tamol adi sad kankan uyanan an nai sen gigin na nigane wa.”

²⁰Tamol kankan milaen ak dugon te imado di? Kubiaen tamol dugon te imado di? Tan en san kaman tamol ru uyan ak njen dan dugon te imado dak i? Tamol naok amaiak in ka dubunawad ak i? An fidian tia ya, man dugo, Anut in tan en san tamolpein inaned kankan milmilae an, ru burau ak igo won iganeg ilasa ya. ²¹Man dugo, Anut insinan kankan milaen an lo inanen ilo girek igo ya. Tan en san tamolpein insiganed kankan milmilae an lo Anut dulon san tia ya. Tia, Anut ilon igo ibol dak man, ru burau a man mabol ilasa na yan lo mi, tamolpein ensauta a ru an ilod lo rumok an, patud ipasi a. ²²Juda adi kulob girager dile wo ilod ibol da, agod Juda tia yak adi man, kankan milaen ak aban an diabi da. ²³Ak gug ru e man mufulale den man, Kristus aigim fo imat ak san ru. Ru en Juda adi ilod lo rumok san dal ifutani da, agod Juda tia yak adi ilod lo man, ru an ru burau ago dubol da. ²⁴Ak man tamolpein ensauta a Anut igiai an, gidad in Juda adi, tia, in Juda tia yak adi, in dulon ak, Kristus man Anut san dabai, agod kankan milaen ak dam Anut san mi a. ²⁵Man dugo, Anut san ilo sou burau man, tamolpein sad kankan milaen an irinani a. Agod mel dabai an tia yak Anut igane dan, tamol sad dabai irinani a.

²⁶Teig taog, ansam wagin Anut ipan an ninen o ilom isou. Tan en san tamolpein malad lo man, an lulunam lo manau tutubu amad da

yan wei an tia ya. Tamol tutubu yak dilasag dumado dan dam wei an tia ya. Agod tamol yaṇad an da yak sad gugoi lo iṇ nuṇod wei an tia dilasa ya. ²⁷Ak gug Anut tamolpein a aenta sad leil lo ṇiṇeo dubol dan ipilianaig, ate talpein a kankan milmilae an miai ipidinai a. Nek ago mi, iṇ tamolpein dabai ad tia yak ipilianaig, ate tamolpein dabai ad da yan miai ipidinai a. ²⁸Taida mi, melmel a tan en lo yaṇad tia yan, melmel a tamolpein patud dupidinai dak, agod melmel nek a ta dien na dan dam ipilianaig, an lo melmel a iṇ dien mok dan mel kawan ak igo woṇ idiraig dilasa ya. ²⁹An lo man, talpein ta Anut naon na sen yaṇan yabisa san tia ya. ³⁰Anut iṇsen mi, aṇanem madok Jesus Kristus lo yan san fun mok a. Anut lou wei mi Kristus ipanig ate id ibinawad a. Kristus lo mi id kankan milaen ak amad da tilasag tumado da. Tamol a id idad go iṇiliad an man Kristus mi a. Iṇ lo yak niṇen o Anut malan lo id itaot, agod gun tilasag tumado da. ³¹Fun an niṇen o ru ta digire yan ago ibol da, “Talpein enti kagin ta niṇen o sen yaṇan yabisa wo igane tap, gidad imoip, iṇ Anut mi yaṇan yabisa wa.”

Pol Kristus niṇen o mi ibol ilasa ya

2 ¹Teig taog, saen ṇai aṇsam na ṇupalug Anut san ru ṇufulale panan man, ṇai kudodom lo ru bulbal ak lo ta ṇiṇiṇeṇ na ya, agod ru kankan milaen ak lo ilasa na yan lo ilom ta ṇiṇane na ya. ²Man fun dugo, ṇai ilo sou igo ṇigane ya, saen ṇai luluṇam lo ṇumado man, ṇai ru an fidian patug fo ṇigane ya. Ru Kristus niṇen o, agod iṇsen aigim fo imat an dam, ru nek an mi ṇabol dugo alon a. ³ṇai aṇ luluṇam lo ṇumado dugo tinig dabai an tia ya. An mi tia, ṇai ṇarer dugo tubun mi ṇusuruwor se yan dam ale ya. ⁴Taida mi, ṇaisag ru agod bilaluṇ ṇabol panan an man, ilom ṇiṇane san kankan milaen ak ate ta ṇabol go alon na ya. Tia, aṇsem ale alon ak, ṇaisag ṇiṇeṇ an Awan Urgun san dabai lo ilasa ya, man dugo, Awan Urgun iṇanen dabai kuai tem ikubiaig ale ya. ⁵ṇai ago ṇigane yan fun man, aṇanem ilo rumok san fun mok an tamol adi sad kankan milaen ak lo ta yen na wa. Tia, ilo rumok an Anut san dabai lo mi yen a.

Kankan milaen a Urgun san na ipalu yan san ru

⁶Ak man tamolpein a Anut niṇen o iṇaned maṇau milaen an luluṇad lo man, rumok, ru a miṇiṇeṇ dan kankan milaen ak lo ilasa da, amaiak dile dulon da. Ak gug kankan an man, saen e gamu tumado den san kankan milaen ak tia geig a, agod tan en san gurman adi sad kankan milaen ak, an dam tia ya. Man dugo, Anut iṇ gurman adi saen gamu tumado den san igane itout o urat igane da. ⁷Ak man kankan milaen a maṇ kuai te migane ilasa dan man, gubak mi mianuk lo yen na ya. Kankan milaen an Anut wagam mok, saen tan en gamugo ilasa yan, iṇsinan ilo sou lo

imiani a, agog saen milaen mok ante yen na ya. Man dugo, Anut fun lo mok tan gamugo ilasa dugo ilon igo yen a, mitep kankan milaen an id ipanad dop lo girager amad da tilasap tumado wa. ⁸Kankan milaen naon en man tan en san gurman adi duloŋ san tia ya. Inj kankan milaen an duloŋ mok tap, kumaen panu san Tubun ak a girager anda yan, aigim fo ta dubali na wa. ⁹Ak man ru ta gubak mi digire yan igo ibol a,

“Melmel a tamol malad nam ta dile na yan,

kududod ta ilon na yan,

kitek ilo girek aman ta digane na yan,

melmel an Anut ikubune lag dien da, an lo dop tamolpein a inj
ninen o dumat dan ipidinai a.”

¹⁰Ak man melmel nek an Anut inŋsen Awan Urgun lo kuai te idirig tile ya.

Awan Urgun inj mel fidian ikubiani da, an lo inŋsad bunun mok ilon uyanan a. Inj Anut san ilo girek nek a ilon lo kuror geig dien dan dam ikubiani fufei da. ¹¹Ak dugo, tamolpein lulunad lo enti inj talpein ta san ilo sou mok ka ilon ak i? Tia, talpein an inŋsinan ur mi a. Nek ago mi, talpein ta Anut san kankan ilon san tia ya, tia, Anut sinan Ur mi inŋsan kankan ka ilon a. ¹²Aria, ur ta tan en san id ta tinjane na ya, tia, Ur a Anut san na ipalu yan mi id tinjane ya. Anut Ur an ipanad a, an lo dop id ka binawek funfun a inj kawan ipanad amaiak talon uyanan a. ¹³Binawek wei mi amaiak ninen o maŋ gamu minjineŋ da. Ru a tamol sad kankan milaen ak ipiteŋanama dan lo maŋ ta minjineŋ na da. Tia, ru a Awan Urgun ipiteŋanama dan lo mi minjineŋ da. An lo maŋau nuŋon a Anut kuai te igane ilasa panama yan, maŋ ru Urgun ipanama yan nam san fun mok mufulale da. ¹⁴Talpein a Urgun ilon lo tia yan, maŋau nuŋon a Anut san Ur san na ipalu dan ta injane na da, man dugo, inj ilon lo maŋau an ru burau igo woŋ ak ibol da. An lo man maŋau nuŋon an ilon san tia ya. Man ata wo? Maŋau an san fun mok ninen o ilon itarpasi san dabai man, Awan Urgun lo mi ilasa da. ¹⁵Ak man talpein enti inj Anut san Urgun aman da yan, inj melmel fidian ikubianip, an lo injaned fudi mok dam ka ilon uyanan a. Ak gug tamol sen ta Urgun ilon lo tia yan, talpein naok an ikubiani san ta idaisuda na ya. ¹⁶Man dugo, profet Aisaia ago ibol,

“Ak dugo, enti Anut ilon ilon pe

an lo inj ka maŋau ipiteŋani wak i?”

Ak gug id Kristus anen maŋau amad da ya, an ninen o nek ibol Kristus ilon isou dak igo woŋ id dam ago ilod isou da.

Biatitek midaeŋ ilod lo yan san ru

3 ¹Teig taog, saen ŋai malmalan anŋsam na ŋupalu yan, tamolpein Urgun san ak igo aŋ da tinjineŋ san tia ya. Tia, aŋ tan en san tamolpein igo woŋ, nek ago mi ŋai aŋ da tinjineŋ se ya. Man dugo, gidad aŋ Kristus lo amado bo man, aŋ nek ibol nanuk adi a injaned tinadi gamu

geig didiraisi ak igo wonj a. ²Fun an lo naj gubak mi su mi nupanaj aluk se ya, anaj dabai ak ta nupanaj na ya. Ata wo, aj anaj dabai ak ani san saen gamugo ilasa da. Agod naj njilanj ak man anjanem saen gamugo da. ³Anjanem kagin ta abileksa na da, tia, aj tan en san tamolpein dida sam kagin naon kisaek a. Man dugo, aj lulunjam lo turak susak kagin, agod nug paek kagin yen da. Kagin naok ago yan man tan en san mi a. Amaiak njinen o aj tan en san tamolpein sad kagin naok an mi agane da. ⁴Man dugo, saen tamol ta aj lulunjam lo ibol, “Njai Pol san,” ago dop ta ibol, “Njai Apolos san,” an lo mansama leil lo man aj nek ibol tan en san tamolpein atutunanai oj da.

⁵Aj dugo ilom isou di? Apolos inj yajak anda yak i? Tia, naj Pol yajak anda yak i? Manj Anut san urat tamol mi a. Inj man anen anen manjanema urat ipanama ya, agod urat a migane yan lo aj Kristus o ilom rumok a.

⁶Njai ai patun nupae dugo Apolos you ipani da, ago gug Anut insen mi kaginan igane dugo isag tubun a. ⁷Amaiak njinen o talpein enti ai patun ipae dan yajan tia ya, agod talpein enti ai patun you ipani dan, inj dam yajan tia ya, ago gug talpein enti a ai patun kagin an iganeg isa dan, nek inj mi yajan an da ya, agod an nek Anut mi a. ⁸Tamol ai patun ipae dan, inj tamol ai patun you ipani dan da, ilod kisaek a. An njinen o urat dugo dugo inj anen anen digane yan, atem Anut urat an naon ipidinai a. ⁹Man dugo, manj man Anut san urat kisaek. Aj man Anut san abi, agod aj man insan ab.

Midaen san urat tamol inj ab bek igo wonj a

¹⁰Ilo panek e Anut naj ipanag en lo man, naj nek ibol ab bek tamol ikawil amag ak igo wonj bag nugunaig dutur da. Agog tamol sen ak bag an fufo ab yabi da. Ak man ab bek tamol anek anek dugo wonj ab a diabi dan njinen o inj gidad kagin digane uyan a. ¹¹Man dugo, talpein ta bag tamol sen ta iguni san tia ya. Tia, bag tamol naj nuguni lag itur da. Bag tamol an man Jesus Kristus mi a. ¹²Talpein ta bag an fufo na gol nam, tia, silva nam, tia, pat naon lak na geig ak nam, tia, ai nam, tia, gafurfur igosan nam, tia, ai roun nam ate ab yabi tap, ¹³urat dugo man igane yan san bunun mok kuai isi wa. Man dugo, nal a ate Jesus imul ipalu wan ilasa wa, an lo dop urat naok dugo yak talpein an igane yan lilaman lo ilasa wa. Urat an san bunun mok an yai lo walal te ilasa wa. Yai an tamol anen anen sad urat ibitinae a, an uyan boi, tia, saian boi, kuai te ilasa dop tile wa. ¹⁴Aria, talpein enti inanan ab isuse yan yai an lo itur sakar tap, Anut talpein an inanan urat naon itaot mok an ipani wa. ¹⁵Ak gug talpein ta inanan ab yai lo inani yau tap, inanan urat igane yan naon ta inane na wa. Ago bo man, talpein an insen ta ideg na wa, tia geig a. Man dugo, Anut patun ipasi wa, nek ibol tamol ta tamol sen ak yai lo ideg o dan yabip yai lo ipasi wak igo wonj a.

Aŋ man Anut san ubou ab

¹⁶Aŋ aŋanem tinim man Anut san tempel, agod iŋanen Ur ilom lo imado dan, aŋ ta aloŋ na yak i? ¹⁷Talpein ta Anut san tempel malan issue tap, Anut talpein an malan issue wa. Man dugo, ab Anut lo imado dan man gun geig a, agod ab an nek aŋsem mi a.

Aŋ tamol niŋedi wo se pitianoi kagin agane amoi

¹⁸Aŋ sem ta irawaŋ na wa. Aŋ lulunam lo tamol ta, tan en san tamolpein dugo woŋ ilod isou dak iri panim, iŋ kankan milaen ak aman da ago ilon isou tap, iŋ gidad iŋanen ilo sou ibilisa wa. Iŋ tan en san tamolpein sad leil lo tamol burau ak igo woŋ ilasa wa. An lo dop iŋ kankan milaen ak aman da ilasap imado wa. ¹⁹Man dugo, Anut san leil lo man, tan en san tamolpein sad kankan milaen an ŋiŋeo igo woŋ a. Ru ta Anut san buk lo ŋaisag ŋiŋeŋ ibalsiŋani da, ru an igo ibol, “Tamolpein iŋsiganed rawek kagin lo mi diau disasaug Anut ibiai a.” ²⁰Agod fon Anut san girek ibol, “Tubun en ilon da, tamolpein kankan milaen ak amad da yan sad ilo sou man, ilo sou kawan a.” ²¹Fun an niŋen o aŋ fon tamol adi niŋedi wo se pitianoi kagin ta agane na wa. Tia geig a. Mel fidian man aŋsami la ya. ²²An niŋen o man, Pol, Apolos agod Pita, iŋ dam nek aŋsami a. Tan en, tia, kumaen iŋ mateŋ da, an dam aŋsami a. Ago mi saen e lo gamu tumado den, agod saen a murnap ilasa wan dam aŋsami a. Rumok nuŋon, mel nek en fidian aŋsam mi a. ²³An lo aŋsem man Kristus san, agod Kristus dam Anut san.

Kristus san aposel adi

4 ¹Amaiak niŋen o aŋ maŋ igo aliama wa. Maŋ Kristus san urat tamol mi a, agod ru a gubak mi an Anut ilon lo imianuk a, gug gamu kuai te ilasa amaiak tamolpein murupidai duloŋ san urat maŋ banima lo iganeg, kaginan migane da. ²Aria, aŋ aloŋ ak, saen urat taman ta iŋanen urat tamol adi urat amaiak banid lo igane man, urat tamol an urat taman san leil lo urat an niŋen o ta diyalis na wa, tia, iŋ urat an kagin dupani uyanan a. ³Aŋ ŋaisag urat apipi ale tap, ŋai ilog ta weiwei na wa. Agod tan en san tamolpein iŋaned kot lo diginiag pe dibitiniag tap, an dam mel kawan a, agod an lo ŋai ilog ta weiwei na da. Rumok, ŋai dam seg ta ibitiniag na da. ⁴Iŋaisag urat walal te ya, agod urat ŋigane yan niŋen o ŋaineg kankan muruan ta ipanag na da. Ago bo man ŋai muruan amag tia yak ago ka ŋabol san tia ya. Tia, Tubun en mi ŋaineg urat ibitinaep ile wa. ⁵Amaiak niŋen o, saen gamugo dop aŋ imug mel ta bitinaek lo ta agane na wa. Tia, Tubun en imul ipalu san saen ilasa wan niŋen o atitiani gup a. Iŋ melmel a gamu mianuk lo dien dugo tidom tubun ituanai dan, iŋanep idiraip kuai te ilalaŋ lo dilasa wa, agod tamolpein sad ilo sou sed

ilod lo dimianig yen dan dam ijanep walal te igane wa. Saen an lo man, Anut mi tamol fidian anen anen ijsad urat dugo digane na yak atem ipitianai a.

⁶Ŋai teig taog, ŋai melmel e niŋen o ru ŋiŋiŋen den lo ŋai Apolos da mitilaen igo woŋ aliama wa. An lo man ŋai Apolos da sama bunuma ale dan lo maŋau aŋanep an lo, ru e tamolpein dubol den san fun mok alon a. “Gidad ru dugo digire yan amaiak aŋ ta abi-riŋani na wa.” Aŋ ago agane tap, aria, aŋ urat tamol ta yaŋan abisa wak gug urat tamol sen ak ta yaŋan abi idu wo ago agane dan amoi. ⁷Man dugo, oŋ tamol, oŋ pein, en ata wo oŋ talpein sen ak riŋani dak ago ilo isou di? Ata mel mok e gamu oŋ tuo lo yen den, emaiak oŋ gubak mi lou panek igo woŋ ta ŋane na yak i? Aria, oŋ mel an lou panek igo woŋ ŋane tap, ata wo oŋ se ipitiano da, nek ibol oŋsigane dabai nam ŋane yak igo woŋ i?

⁸Nag aŋ Korint tamolpein, aŋ mel fidian aŋal go idaisuda la yak boi! Nag binawek funfun a Urgan ipanaŋ dan ilom ijanefute la yak boi! Aŋ kiŋ adi igo woŋ alasa la ya, agod an man maŋsama binawek lo tia yak boi! Ŋai ilog ibol dak aŋ kiŋ adi igo woŋ alasa yan rumok a. Man dugo, an lo dop maŋ aŋ da sisem kiŋ adi igo woŋ ka tumado wa. ⁹Ata wo ŋai ago ŋabol ak i? Ŋaisag leil lo man, maŋ aposel adi nek ibol yu tamol a gugurut nam mateŋ dile san kob diŋane yak ago mi mumado da. Aŋ alon ak tamol iŋ yu digane itout pe dumul dop, ijsad ager diŋal pe patud na dirau oŋ dida diau dop lo tamolpein dal awan ananaem dutur dan ka dil a. Agop wagai lo nug dufuni san aben ante dilasap ijsed nug dufuni dop dumat a. Ru mitilaen an maŋ aposel dam tou amam yabi da. Maŋ nek mel ta senamo geig ak walal isip, an lo melmel fidian diliama san ago milasa ya, eŋel sad leil lo, agod tamol malad lo dam mi a. ¹⁰Maŋ aposel adi Kristus wagen lo burau tamol milasag mumado da, ak gug aŋsem mi Kristus lo amado dugo kankan milaen am da ya! Maŋ tamol dabai am tia yak, gug aŋ man dabai tinami a! Aŋ yaŋam diabisa da, ago gug maŋ yaŋama diabi idu da! ¹¹Maŋsama madok fun lo mumadog ipalug gamu mumado den man igo ya. Maŋ anaŋ o mamat dak, you o dam mamat da, agod maŋsama biouŋ dam imasisire yau a. Maŋ panu panu mator dugo saian dupanamag tinima dam dusue ditare na ya, agod aben ta ate yaes mabal san sasau ta yen man tia ya. ¹²Maŋsema banima nam urat wagai migane da. Saen tamolpein dumisilanama dan, maŋ bar uyan ak mi mupidinai se ya. Saen muruan dupanama dan, muruan an misinip matur sakar se ya. ¹³Saen maŋ niŋema wo uf digane dan, maŋ ilo panek ru lo mi ru naon murupidai da. Maŋ nek ibol tan en san nun samuk samuk igo ya, tia, ibol sas bod tinin te isuda yak igo ya. Tan en san tamolpein malad lo maŋ gubak mi ago mumado se ya, agod gamu man ijsad ilo sou kisaek mi a.

¹⁴Ŋai ru en ago ŋigire an lo aŋ miai ŋupanaŋ o tia, tia, ŋai kududom ŋabi dugo ru kagin ŋupanaŋ da, nek ibol aŋ ŋaineg nanug muroug adi

igo wonj a. ¹⁵Gidad anj Kristus lo yan titianek tamol wei mi amam da ya, ago bo man, anj tamam wei an tia ya. Man dugo, ru uyanan a jurupaianj go alonj an lo man, naj anjanem tamam Kristus lo yak igo njilasag njumado da. ¹⁶Fun an njinen o anj njududuwanj da, ago dop anj naj atutujanag pe, anjam tutujanek tamol igo wonj asodudunag njilasa wa. Njasag kagin naok naok an anek anek atem agam agane wa. ¹⁷An njinen o Timoti njidinig anjam na ipalu da, Kristus lo inj njaisag nanug igo wonj njinen o njamat da. Inj Tubun en san urat njinen o ilon dabai mok a. Inj ka ibinawanj dop, imug naj lulujam lo njumado dugo, kagin naok naok a Kristus lo njigane na yan ilom isou da wa. Kagin a njigane na yan, inj ru a aben fidian sad Kris midaenj kisaek kisaek atem njupitejanai na yan da, naon kisaek mi a.

¹⁸Anj aenta man sem isodudunanj alasa dugo ru kawan tubun mi anjinenj da, man dugo, anj ilom lo naj anjam na ta njupalu na wak ago abol da. ¹⁹Ak gug Tubun en ilon ago yen tap, naj gugurut nam anjam na njupalu wa. Saen an lo, talpein a njinenj tutubun mi digane dan njukubianai nejil a. An mi tia, injad dabai mok Anut san na dinjane boi an dam njile wa. ²⁰Man dugo Anut san kagin panek ilon lo man, njinenj tutubu yan inj mel malan te yak tia ya, tia, mel malan te man Anut san dabai, tamol tinin lo mi yen da. ²¹Dal dugon lo naj anjam na njupalu wo anj ilom ibol di? Ak dugo, bu njinanep da njupalu wak i? Tia, naj njupalup ilo panek kagin, agod mos kagin dam njukubiaip ale wo ilom abol di?

Teim a jeit igane dan anjam midaenj lo akudi

5 ¹Anj lulujam lo aenta ru disinig njaisag na dupalug igo durupaiaj, jeit kagin naok saian geig ak yen da. Agod gob adi lulujad lo jeit kagin naok igo yak ta yen man tia ya. Ru njabol den fun igo ya, anj lulujam lo tamol ta inj injsinan taman san iwon foun amaiak injaneg ida dien da. ²Anj an alonj bo man, anj sem ipitiananj da! Gidad anj ilom tubun mi ipapaop amado wa. Ago dop tamol a kagin ago igane dan akudip midaenj patun fo agane ilasap imado wa. ³Gidad naj anj sinjirem na tia yak gug njaisag ur anj da amado da. Agod naj tamol a kagin ago yak igane yan njukubiani la ya, nek ibol naj anj da tumado dak igo wonj a. ⁴Njai ru kagin igo njupananj da. Saen anj Tubun ak Jesus yanan lo apalu atumani dop naj njaineg ur lo anj da tumado dop, agod Tubun ak Jesus san dabai an anj lulujam lo imado man, ⁵tamol an Satan tuon lo aganep an lo injanen tinin aupasek anda yak pitininek injane wa. Ago dop an lo Tubun en imul ipalu san nal lo tamol an san ur patun ipasi wa.

Anj aup aupasek adi ta aganurai na wa

⁶Anj sesunoi kagin agane dan man ta uyan na ya. Yis kabelan inj flawa tubun ak da you da atumanip yis an ifurak yau san urat yaup iganep

anaj an fidian ikafut a, dugo, an ta alon na i? ⁷An ninen o an gidad yis wagam ak abal yau a, an lo dop an nek ibol anaj yis aman tia yak igo wonj alasa wa. An nek ibol anaj naok ago yak igo wonj an rumok a. Man dugo, Kristus man Anut yai digane pani an lo imat la ya, injen mi idsad Pasova san sipsip nanun id tani san mi a. ⁸Amaiak ninen o Pasova san soubul id kagin tupani wa. Ak man id yis wagam ak ta tani na wa, tia, yis an man ru mitilaen igo wonj a, an siai kagin agod kagin saian geig ak dam mi a. Id soubul an san anaj yis aman tia yan tani wa, anaj an man, ru a ilon lo rawek ta yen na dan, agod kagin a idsad ilo rumok igane ilasa dan mi a.

⁹Ŋaisag girek imug en lo ŋai an igo ŋurupaianj da. Anj tamolpein jeit kagin tinadi ak siŋired na ta amado ator na wa. ¹⁰Ŋai tamolpein tan en lo sad madok saian ak niŋedi wo ta ŋabol na da. Tia, ŋai tamolpein naok igo amaiak niŋedi wo ilog isou da: tamolpein jeit kagin digane dak, a aenta sad melmel niŋedi wo inaned kankan mala sek mi awan isa dak, a tamol gol ak dufup sad melmel digam dak, agod a tubud sewak yaŋad lo ubou dile da. Anj tamolpein naok ago yak abisawaip asau mi aup amado tap, an tan en abisei pasik a. ¹¹Ŋai gamu girek ŋigire en lo dugo ilog isou dan kuai tem ŋabol o da. Tamol ta in igo ibol, in ilo rumok tamol, ago gug in jeit san kagin igane da, tia dop, in tamol malan sakar tinan, tia dop, in tamol tubud sewak niŋedi wo ubou ile dan, tia dop, in lukluk san tamol, tia dop, in gumagam san, anj tamol naok ago yak ta aganuri na wak, agod dida amasip anaj ta ani na wa.

¹²⁻¹³Anj dugo ilom isou di? Ŋaisag urat en lo tamolpein a Kris midaen patun fo dumado dan kibianek lo ŋidirai ak i? Tia geig a. Anut mi tamolpein naok an ikubianaip yil a. Ak man anj Kris midaen, anjam urat man tamolpein anjiganem midaen ilon lo an mi akubianaip eil a. Anj Anut san girek ibol ago agane, “Tamol anj lulunjam lo igane saian dan, akudip yau a.”

Tein inanen tein kot lo igane yan ninen Pol ipidai da

6 ¹Kagin e anj lulunjam lo yen den uyan tia ya. Saen anjam midaen ilon lo talpein ta mel ta ninen o inanen turan ile saian dan, inaneg ida diaug midaen naod na muruan an ta dukubune na ya. Tia, inj turan an inaneg kot lo yaug gob adi banid lo inaneg kot dupani a. Kagin naok an saian geig a. ²Id gun adi man, murnap tan en san tamolpein bitinaek lo tidirai a, an ta alon na i? Anj tan en san tamolpein akubianaip eil a. Fun an ninen o, enta wo anj lulunjam lo mel tusan ak akubianip nek muruan an akubune san, anj ta idaisuda na yak i? ³Id eŋel adi dam bitinaek lo tidirai an anj ta alon na i? An ninen o sapta taida dop id Kris idsad maŋau idaisuda wa, an lo idsad muruan tan en san man gamu ka tukubune wak i? ⁴An ninen o ŋai igo ŋurupaianj, gidad tamol midaen ilon lo yaŋad tia

yak, an̄sam muruan tan en san ka bitinaek lo diganep dukubune wa.

⁵Ŋai ago ŋabol an lo miai ka ŋupan̄a a. Ak dugo, aŋ luluŋam lo tamol ta iŋanen kankan milaen ak idaisuda yan alep, lo iŋ muruan a dugo ilasa dan ka ikubune san tia, an rumok ak i? ⁶Tamol naok ago yan aŋane amoi a, tia, an̄sam kagin igo ya. Tein Kris ak ta iŋanen tein iŋaneg yaug kot lo igane da. An mi tia, ilod lo ta rumok na yan naod na aŋ ago agane da!

⁷Aŋ luluŋam lo tein ta iŋanen tein kot lo igane dan niŋen o, kagin en kuai tem ikubiai ale da, Satan aŋ ibiaŋ adu geig a. Dugo, oŋ umoi dop oŋane tei muruan ipano tap, an saian ak i? Dugo, oŋ ule funip oŋane tei oŋsa melmel igam o irawo tap, an saian ak i? ⁸Ak gug aŋ ago agane man amoi da. Tia, aŋsem tamolpein aenta arawaig iŋsad melmel agam o agane da, agod dal sen ak lo dam agane saian da. An mi tia, kagin en aŋanem teim Kris ak lo dam agane da!

⁹Tamolpein kagin sisaiak digane dan Anut san kagin panek aben lo diladu san tia ya, an ta aloŋ na yak i? Mel en niŋen o aŋ sem ta irawaŋ na wa. Tamolpein naok igo man kumaen panu diŋane san tia ya: tamolpein jeit digane dan, tubud aenta ubou ad dile dan, a talpein sen ak iwon ida dien dan, tamol iŋ tamol mi nug iwon oŋ digane dan, ¹⁰tia, gumagam adi, gidiged adi, lukluk tamol adi, a uf digane dan, agod a rawek lo gumagam kagin digane da. Tamolpein fidian a kagin ago digane dan, Anut san kagin panek diŋanep paen na dumado san tia geig a.

¹¹Agod aŋ aenta tamolpein naok ago yak amado se ya. Ak man aŋ suguek aŋaneg, Anut idiraŋ go tamolpein gun ak alasa ya. Agod idsad Tubun ak Jesus Kristus yaŋan lo, agod idsad Anut iŋanen Ur lo dam, aŋ Anut malan lo man itaotam alasag amado da.

Jeit kagin niŋen asol au a

¹²Aŋ igo abol da, “Kagin dugon niŋen o ŋamat dan ago ka ŋigane wa.” An rumok, ak man kagin fidian ta dubunawaŋ na wa. Ŋai dam niŋeŋ ago ka ŋabol a, mel dugo ŋigane wo ilog ibol dan ka ŋigane wa. Ak man ŋai niŋeŋ naok en ta ŋiganuri na wa, man dugo, kagin ta a saian an ŋai itirnaŋ man ŋamoi a. ¹³Aŋ abol, “Anaŋ man tiŋaed san, ago dugo tiŋaed man anaŋ san.” Gug ŋai ŋurupaiaŋ da, Anut murnap tiŋaed iŋ anaŋ da sisem daoŋ ipidinai a. Kabelan aŋ jeit kagin an mel tusan nek ibol anaŋ ani dak igo woŋ ilom isou banau. Man dugo, Anut idaned tinid man jeit kagin san, ilon ago ta yen na ya, tia, idaned tinid san biabi man, id Tubun ak san urat tiganeg tumado da. Ago dugo Tubun en idaned tinid kaginad iganeg imado da. ¹⁴Anut iŋanen dabai lo Tubun en materŋ lo ifufunig kumaen imasag imado da. Nek ago mi id dam ifufunad pe kumaed tumasap tumado wa. ¹⁵Aŋ tinimi anen anen man Kristus tinin san boi kisaek kisaek a, aŋ an ta aloŋ na yak i? Ago tap, ŋai Kristus tinin san boi ta kisaek ŋiŋanep jeit pein da ŋutumani wak i? Man tia geig a! ¹⁶Tamol a jeit pein da dien dan,

injaned tinidi an dutumanig kisaek a, an ta aloŋ na yak i? Man dugo, Anut san ru lo igo ibol, “Tamol iŋ pein da dutumanip tinid kisaek ilasap dumado wa.” ¹⁷Ak man talpein a Tubun en da dutumani dan, injanen ŋutun ilon lo man iŋ Tubun en da bubed kisaek ilasag dumado da.

¹⁸Fun an niŋen o jeit kagin amoip asol au a. Ata wo? Aupasek naok aenta fidian a talpein igane dan man talpein an tinin patun fo dien da, an lo aupasek an injanen tinin ta isue na da. Ak man iŋ a jeit igane dan injanen tinin malan isue da. ¹⁹Aŋanem tinimi an man Awan Urgun san aben gun a, an ta aloŋ na yak i? Anut injanen Ur iganeg ipalug aŋ ilom lo imado da, an niŋen o aŋ tinimi an aŋsam tia ya. ²⁰Anut nanun san mater lo idad iŋiliaŋ an naon tubun mok a, an niŋen o aŋ tinimi san kagin naok naok atem, Anut yaŋan abisap lak na geig asini wa.

Nug iwon ŋanek san piteŋanek ru

7 ¹Girek ŋaisag na aganeg ipalu yan lo, ŋai aŋ mel ta lo ru kagin ŋupanaŋ o abol a. Malmalan mok ago abol, tamol iŋ pein ta iŋane nap kawan imado wa, an uyan ak i? Aria, ŋai ru naon igo ŋurupaiaŋ da. Rumok, tamol iŋ pein iŋane wo imoi dop man an uyan a. ²Ak man gamu aŋsam taun lo jeit kagin ilasag tubun a, an lo tamolpein wei mi kagin an lo diau dudu da. An niŋen o gidad tamol iŋ iwon anda wak, agod pein dam iŋ tamol anda wa. ³Tamol iŋ iwon da sisem dien dan uyan a. Tamol tinin an iŋsan pein ipani wak, nek ago mi pein tinin dam iŋsan tamol ipani wa. ⁴Man dugo, pein iŋsen tinin iŋsan mi man tia ya, tia, iŋanen tinin iwon tamol ak san. Nek ago mi tamol dam iŋanen tinin iŋsan mi tia ya, tia, iŋanen tinin iwon pein ak san. ⁵Oŋ iwo da aen o ta umoi na wa. Ak man saen oŋ gudanek gane san saen ta piliani tap, an uyan ak oŋ iwo da awam kisaek gup ago agane wa, ak man an saen katukan mi wa. Aria, saen isuda dop man fon atumani da wa. Man dugo, kabelan oŋane tini masak itirno dop lo Satan dal gane panip oŋ ilo iŋanep jeit gane banau. ⁶Oŋ pein ŋane wak ŋai ru dabai nam ago ta ŋurupaio na da. Tia, ak man oŋ ilo man, pein ŋane wo ibol, ŋai awok ŋupano wa. ⁷ŋai iwog tia ya, ago yak niŋen o tamolpein ilod lo rumok dan, ŋai ŋumado dak agom dumado wo ŋamat da. Ak man fidian dal an lo ago dumado dan muruan mok a. Tamol kisaek kisaek, pein kisaek kisaek atem Anut dabai anen anen ipidinai da, talpein ta binawek naok ta iŋane dugo talpein sen ta binawek sen ak dam iŋane da.

⁸Aria, aŋ tamolpein a iwom tia yan, agod pein suos adi dam, sam na ru kagin en ŋurupaiaŋ da. Aŋ nek ŋai igo kawan amado dop man, an uyanan a. ⁹Ak man iŋ siganed ilodi ka ditirni san ta idaisuda na dop, gidad iwodi dusu wa. Kabelan iŋ tinid tubun mok imasa banau.

¹⁰Aŋ tamolpein iwom da yan ru kagin en ŋurupaiaŋ da. (Ru kagin en ŋaisag tia ya, tia, Tubun en ru en o wagam mi ibol ilasa la ya.) Pein

ta iwon tamol ak ta mok ibisei na wa. ¹¹Ak man pein an iwon tamol ak ibisei tap man, in kawan imado yau a. Tia dop, fon imul yaup iwon tamol ak da dumado da wa. Ru kagin taidam igo jurupaian da, tamol dam iwon pein ak ta mok ibisei na wa.

¹²Aria, hai an aenta ru kagin igo jurupaian da. (Tubun en igo ta ibol na ya, an nihen o naiseg igo jurupaian da.) Tamol Kris ak ta inanen iwon ilon rumok an tia, gug in tamol da dumado wo ilon ibol tap, gidad pein an gob imado da, tamol an pein ta ibisei na wa. ¹³Nek ago mi pein Kris ak ta tamol gob ak da dumado da, agog in pein da sisem dumado wo imat tap, pein an tamol ta ibisei na wa. ¹⁴Man dugo, Anut malan lo pein e ilon lo rumok den gun imado da, agod an inanen iwon tamol ak ilon lo rumok tia yan ituani da, ata wo, tamol an inanen iwon pein ak ilo rumok anda yan ida dutumani a. Nek ago mi, pein a ilon lo rumok tia yan, inanen iwon tamol ak san ilo rumok an lo man, gun ilasag imado da. Ak kagin en igo tia tap, an pein tamol naom ago yan ananem nanuk adi in gob sad nanuk adi igo won dumado da. Ak man rumok, ananem nanuk adi ikok dumado dugo Anut anen muroun muroun dida dutumanig gun dumado da.

¹⁵Ak man onane iwo ilon lo rumok tia yan ibisawo tap, gidad ulefunip in ka yau a. Saen kagin naok ago ilasa dan man, on tamol on pein ilo rumok a da yan ta isubano na da. Man dugo, Anut an maror lo mi amado wo igian a. ¹⁶Ak dugo, on pein onane iwon tamol ak binawip in dam ilo rumok tamol ilasa wak boi, tia wak boi, an ulon ak i? Agod on tamol onane iwon pein ak binawip lo gob sad kagin ibiseip Kristus o ilon rumok ak boi, an ulon ak i?

¹⁷Ak man gidad, an anen anen madok naon dugo yak a Anut ipilianig ipan an, ate nek ago amado yau a. Man dugo, Anut an anen anen madok naok anen anen atem anane wo igian la ya. Ru kagin a hai midaen fidian ilod lo ngansi dan man nek an mi a. ¹⁸Ak dugo, tamol ta saen Anut iwagi dan inanen tinin sunulon dutute la yak tap, an gidad imoip ago ka yen a. Tia, Anut tamol ta iwagi gug tinin sunulon ta dutute na tap, in tinin sunulon dutute wo isumianai man imoi a. ¹⁹Tini sunulon tutek an mel kawan a, tini sunulon tutek tia yak dam mel kawan a. On Anut san ru kagin fidian uri pani san man mel malan te ya. ²⁰Aria, hai fon jurupaian da, saen Anut an igian man, an anen anen madok naon dugo yan ate amado dan, an anen anen nek ago amado yau a. ²¹Saen Anut igian an an bigabeg amado dugo igian i? Ak man gidad, an nihen o ilom weiwei amoi. An Anut dal ikubiai pan an dop an tamol bigabeg tia yak igo alasa wak tap, dal an ago ka agane wa. ²²Man dugo, tamol a bigabeg urat iganeg imado dugo Tubun ak iwagi an man, in Tubun en san tamol kawan igo imado itor da. Nek ago mi, tamol a kawan imado itor dugo Kristus iwagi an man, in Kristus san tamol bigabeg urat igane san

a. ²³Anut aŋ idad iŋiliaŋ a, an naon man lak na geig a. An lo aŋ Kristus san mi a, an niŋen o kabelan tamol sen ak san bigabeg igo alasa banau. ²⁴Aria, oŋane madok kagin naok naok dugo woŋ lo mado utor dugo Anut igio yan, nek ago mi mado utor yau dop, Anut da nug turan igo woŋ ago ka amado ator a.

Talpein a nug iwon ŋanek tia yan ru kagin irupidai a

²⁵Ŋai gamu aŋsam sumianek tamolpein iwod tia yak lo agane dan naon ka ŋurupaiaŋ a. Tubun en ru kagin en ŋurupaiaŋ o ta ibol na ya. Tia, en ŋaiseg ilog nam ŋurupaiaŋ da. Aŋ ŋaisag ru kagin ka aŋane wa, man dugo, Tubun en iŋ ŋai ilon imuŋanag go maŋau uyanan ipanag en lo ŋubunawaŋ a. ²⁶Saen gamu lo tumado den muruan wei mi id siŋired na ipalu yan niŋen o, ŋai ilo sou igo ŋigane da, oŋ iwo tia mado tap, an uyan a. ²⁷Oŋ iwo ŋane la i? Ago tap, kudi dop iwo tia mado wo gane umoi. Tia, oŋ iwo tia mado di? Ago tap, oŋ iwo ta ŋane wo abaŋ ule umoi. ²⁸Ak man oŋ kawan madop iwo ŋane tap, an aupasek tia ya. Agod kubakan ta iwon iŋane tap, an dam aupasek tia ya. Gug tan en lo tamolpein a iwodi diŋane dan muruan wei mi dile wa, an niŋen o ŋai ilog ibol dak man, muruan naok an aŋ iriŋanaŋ a.

²⁹Teig taog, ŋai igo ilog isou da. Tan en san saen katukan mi a. An niŋen o gamu agod nal murna san fidian, tamol ensauta a iwod da yan, nek ibol tamol a iwod tiag dumado dak igo woŋ, ago dumado wa. ³⁰A tinaŋ aru digane dan, nek ibol tamolpein a tinaŋ aru ta digane na dak igo woŋ, ago dumado wa. A ilo uyan lo dumado dan, nek ibol iŋ ilod muruan dak igo woŋ ago dumado wa. A mel ta didad diŋane dan, nek ibol mel an iŋsad tia yan niŋen o iŋ diabi yau san tia yak igo woŋ, ago dumado wa. ³¹Agod a tan en san melmel urat dupidinaŋ dan, nek ibol tamolpein a tan en san mala bulbal iŋaned bubed ta isubani na dak igo woŋ, ago dumado wa. Man ata wo? Tan e gamu tile den fidian itout o sumeik da.

³²Ŋai aŋ ilo weiwei amam da amado wo ilog ta ibol na da. Tamol a iwon tia yan iŋ Tubun ak san urat kagin ipani da, agod dal dugon lo iŋ ka Tubun en ilo uyan ipani san niŋen o mi ilon isou da. ³³Ak man tamol iwon anda man, tan en san kagin naon irae da, an niŋen o dal dugon lo iŋanen iwon ilo uyan ipani san niŋen o ilon isou da. ³⁴Fun an niŋen o iŋanen ilo sou lo gilek yen da. Pein ta a iwon an tia yak ta, tia, kubakan a Tubun ak san urat kagin ipani san saen anda yak ta boi, kob ate yau o ilon ibol dak igo ya, iŋ tinin ŋutun fidian lo iŋanen Tubun ak san ilobol iŋanuri wo ilon tubun mi yen da. Ak man pein a iwon anda yan iŋanen ilo sou an senamo ya, dal dugon lo iŋanen tamol ka ilo uyan ipani wo yaes ifuni da. ³⁵Ŋai aŋ ŋusubanaŋ o ilog ta yen na da, tia, ŋubunawaŋ o ru ago ŋurupaiaŋ da. Ŋai ilog man, aŋ kagin uyan ak lo amado dop, aŋanem tini ganei Tubun en lo man nek itaot yen a.

³⁶Aria, tamol enti kubakan ta njen dupani an, gamugo injane dak gug, injanen ilo sou lo kagin a kubakan an lo igane dan ta uyan na dugo, kubakan an inj tamol injane wak san saen kitekan irinjani la ya, ago dugo tamol an ilon lo ikubiani ak man, kubakan an injane wak ago ilon isou tap, aria, ilon dugo ibol dan ago ka igane wa. Inj au ta ipas na da, uraru an ka nug dijanep nug iwon dumado wa. ³⁷Ak man tamol an tamolpein sen ak ta disoduduni na dugo, injanen ilo sou dabaig, injanen ilo masak dam itirni fufei da, agod kubakan an ta injane na wak gug injanen nje panek pein igo wonj imado yau o ilon ibol tap, an dam uyanan a. ³⁸Amaiak njen o tamol enti kubakan njen dupani an injanen iwon igo injane dan, kagin uyanan igane da. Ak man tamol enti kubakan an iwon igo injane wo imoi dan, inj dam kagin nen uyanan ak igane da.

³⁹Pein a tamol anda yan, Anut san kubiaen isubanig, saen injanen tamol gamugo imat dugo, insan tamol ibiseip tamol foun ak ta injane na wa. Ak man saen dumado yau nap tamol ak imat tap, pein an inj ilon yen dan ago mi tamol foun ak ka injane wa. Ak man inj tamol enti a Kristus san an mi ka injane wa. ⁴⁰Ago gug naj igo ilog isou da. Pein an imoi kawan imado tap man, nen ilon uyanan a. Taida mi, naj igo ilog isou da, naj dam Anut anen Awan Ur amag da ya, an njen o inj naj ulum ag yabi dugo naj ru kagin en jurupaian a.

Mudan a tubud sewak yai digane pidinai dan san ru

8 ¹Aria, naj gamu mudan a tamolpein tubud sewak adi yai digane pidinai dan njen o nabol alon a. Anj igo abol da, “Id fidian manau amad da ya.” Awo, id fidian talon man ru an ru rumok a. Aria, talpein a manau anda yan sen ipitiani wa. Ak man talpein a Anut anen tamolpein nijedi wo ilon ipidinai dan, injaned ilo rumok dabai ipani wa. ²Tamol a injanen manau njen o ikawil an ago ibol dan, njen naok an lo mel en kuai tem ilasag yen dugo tile da, injanen manau gamugo tubun a. An lo man manau naok a tamol an yabi wo Anut ilon ibol dan, an inj ilon lo man katukan go ago yen da. ³Ak man tamol a Anut ilon ipani dan, inj tamol an ilon fufei da.

⁴Anj gubak mi mudan a tubud sewak sad ai pat mitilaedi yai digane pidinai an ka ani san njen o asumianag a, aria, gamu ru naon jurupaian da. Rumok, id fidian talon uyan ak, tubud ai pat mitilaedi man tan en lo mel nunon an tia ya. Taida mi id talon ak, Anut kisaek o lian inj mi rumok imado da. ⁵Mel wei mi a tamolpein “tubud” dubol dan, tan na boi, tia keit lo boi dumado dak ago tan en san tamolpein ilod lo rumok da. (Rumok, tamolpein mel wei mi “tubud” dubol da, ago dugo inj mel wei mi dam “tubun ak” dubol dak ago talon a.) ⁶Ak man gidad, id Kris adi talon man, Anut mok imado dan inj kisaek o lian a. Inj mi id Tamad, inj mi mel fidian idiri a, agod id ilo uyan tupani wo kumaed dumado da. Taida mi,

idsad Tubun ak kisaek mi a, an man Jesus Kristus. Injanen tuon lo mel fidian dilasag dumado da, injanen dabai lo dam id tumado yau da.

⁷Ak man maŋau naok e niŋen o ŋabol den, Kris fidian ilod lo ta yen na da. Man dugo, Kris aenta ilod isou yau dak man, tubud ai pat mitilaedi iŋ mel rumok ak mi a, ata wo, gubak mi iŋ gob adi sad tamol kagin diri se ya. Amaiak niŋen o saen mudan a tubud sewak ai pat mitilaedi yai digane pidinai an diani man, “mudan en tubud aenta san,” ago ilod isou da. Ilod itarpasi man tia ya, an lo injaned kankan ilon lo kagin uyan ak, kagin saian ak dibiatai o muruan geig a, an niŋen o injaned kankan nun anda ilasag yen dan ago dukubiani da. ⁸Ak man anaŋ dugon tani dan niŋen o Anut ta ipitianad na wa. Id ta tani na tap, mel uyan ak ta iriŋanad man tia ya, nek ago mi, id tani tap, mel uyan ak taidam tiŋane san tia ya.

⁹Aŋ aŋsem pilianek agane san idaisuda ya, ak man kagin agane wa, kabelan pilianek agane dan, tamol a ilod itarpasi an tia yan sad ilo rumok an apitiŋini banau. ¹⁰Ak dugo, talpein ta ilon ta itarpasi na yan, oŋ a maŋau lak na geig ama da yan, tubud ai pat mitilaedi san tempel ilon lo masig mudan wani dugo ilio yak man, iŋ dugo ilon isou wak i? Kagin e oŋ gane den lo talpein an ilon yabisap, an lo iŋ dam mudan a tubud sewak yai digane dupani dan yani wa. ¹¹Agop oŋane tei e ilon ta itarpasi na yan, oŋane maŋau lak na geig ak lo oŋ tei an pitiŋini da, ak man Kristus talpein nek emaiak dam ibinawi wo imat a. ¹²Dal an lo oŋane tei ilon ta itarpasi na yan san kankan malan sue da. Saen oŋ muruan naok e pani den, aupasek gane da, agod Kristus lo dam aupasek gane da. ¹³An niŋen o anaŋ ta e ŋani den teig iganep aupasek lo yau idu tap, gidad an mudan boi, tia, anaŋ sen ak boi, ŋai anaŋ naok an ŋani ŋamoi a. Man dugo, ŋai ilog igo yen da, kagin e ŋigane den lo talpein sen ak ta yau idu na wa.

Binawek naok dugo aposel adi diŋane san iŋ idaisuda ya

9 ¹Ak dugo, ŋai seg ilog nam ŋator san tia i? Dugo, ŋai aposel tia yak i? Dugo, ŋaiseŋ malag nam idsad Tubun ak Jesus ta ŋile na yak i? Ak dugo, aŋ ilo rumok adi ŋaisag urat wagai Tubun en niŋen o ŋigane na yan nuŋon aŋsem mi yak, an ta ale na i? ²Aŋ aloŋ uyanan ak, mel an fidian rumok a. Gidad tamolpein sen ak sad ilo sou lo ŋai aposel tia ago dubol da, aŋ man ago abol san tia geig a. Man dugo, Tubun ak ipilianag go ŋai aposel ta ŋilasag ŋumado yan san kob man, nek aŋsem mi a.

³Tamolpein a ŋai bitinaek lo diginiag o ilod ibol dan, gamu ru naon igo lo seg itargiranag san ŋurupidai da. ⁴Maŋ aposel iloma ibol tap, aŋ maŋ pat apanamap ate madad pe mani maluk dop mumado wo malama ka migane wa. Binawek naok a miŋane san maŋ idaisuda ya. ⁵Nek ago mi, maŋ iwoma ilod lo rumok an ka maŋal pe dadi mator dop urat migane

wa. Aposel aenta ago digane da, Pita ago igane dak, agod Jesus sen tein muroun dam ago digane da. Ak dugo, maŋ mi ago migane san ta idaisuda na i? ⁶Tia dugo, ŋai Banabas da, nek ibol aposel aenta igo woŋ tia ya, maŋsema mi banima nam urat migane wak ago abol di?

⁷Ak dugo, yu tamol ta iŋ wagai san urat igane dan, iŋsinan moni sen ipani dak i? Ak dugo, enti iŋanen abi lo ai patun ipae da, ago gup anaŋ a yani wan imoi ak i? Ak dugo, enti bilelek kagin ipidinai dan, bilelek an sad su iluk san imoi ak i? ⁸Ak dugo, dag ru milaen mi e ŋabol den, tan en san tamolpein iŋaned kankan lo ilasag ŋiŋiŋeŋ dak ago ilom isou dak i? Ak man Moses san kubiaeŋ an lo ru naok kisaek ibol da. ⁹Kubiaeŋ an lo ru emaiak e digireg yen da, “Saen makau wit fufo ila iso dop metmet ikak yau o ipartitale dop, oŋ makau awan ta wafutani na wa.” Ak dugo, Anut ru an nam makau mi niŋen o kagin ipani dak ago ilom isou di? ¹⁰Dugo, id ibinawad o iŋ ru an irupaiaŋ da, an rumok ak i? Awo, iŋ id niŋed o ilon isou se ya, an lo Moses kankan ipaniŋ iŋ kubiaeŋ lo ru an igire ya. Fun ata wo Anut ago ilon isou se yak i? Talpein enti anaŋ ipae dan, agod talpein enti anaŋ nuŋon ituteg iŋane dan, iŋ sisem anaŋ naon a murnap diŋane san niŋen o malad digane da, an mi ka diŋane wa. ¹¹Maŋ aŋ luluŋam lo kumaen panu san ai patun wei mok mupae se ya, an rumok tap, dugo, aŋ kulob an naon, tan en san melmel lo abinawama wo malama migane dan niŋen muruan ifunaŋ di? ¹²Tamol aenta aŋ luluŋam lo iŋsad urat niŋen o naon diŋane san idaisuda tap, binawek naon kisaek miŋane san niŋen maŋ idaisuda geig a! Ru e ŋurupaiaŋ den, rumok i? Tia i? Aŋ akubianip ale wa.

Ak man maŋ gubak mi aŋ binawek naok an apanama wo ta musumianaŋ na ya. Rumok, binawek an apanama san dabai maŋ da ya, gug miŋane man mamoi a. Ata wo? Maŋ iloma man, maŋsema mi muruan fidian misini wa, an lo dop Kristus anen bilaluŋ uyan ak tamolpein murupidaip duloŋ san dal ta mufou na wa. ¹³Tamol ensauta a tempel ilon lo urat digane dan, iŋsad anaŋ man, anaŋ a tamolpein disinig Anut dupani wo tempel lo dupalu dan aenta diŋane da, an ta aloŋ na i? Agod a alta fo mudan dumari idu dan, iŋ mudan an aenta sed niŋedi wo ka disinip diani wa. ¹⁴Dal nek ago mi, Tubun en ru dabai anda yak nam igo irupaiaŋ a, tamolpein a bilaluŋ uyan ak dufulale dan, iŋaned urat naon man tamolpein a dibinawai dan dupidinai a.

¹⁵Ak man ŋaineŋ urat naon ŋiŋane man ŋamoi da. Taida mi, ŋaisag ru e ŋigire yen igo asuti dop an lo ŋaineŋ urat naon apanag o ta ŋigire na da. Tia, kagin e ŋigane den, emaiak niŋen o ŋai ka seg ipitianag a, an niŋen o talpein ta kagin an ipasi yau o man, ŋai ilog tubun geig imoi da. Man dugo, urat naon ago apanag o tap, gidad ŋai ŋamat gup. ¹⁶Ak man gidad, ŋai ru Kristus niŋen o yan tamolpein ŋurupidaip duloŋ gup, ŋai sen ka seg ipitianag san man tia geig a. Ata wo? Jesus sen ŋai ago ŋigane

wo irupaiag a. Inj awan njabi wa, tia tap, muruan tubun geig njane wa! ¹⁷Ŋai seg ilog nam inanen ru njabol ilasa dak ago tap, rumok, njaisag urat naon njaisag na ipalup njane wa. Gug seg ilog nam urat an ta njigane na da. Tia, dugo mok njigane dak i? Mala nouk a saen Kristus urat en banig lo igane dugo, tinin ilon lo yen dan mi, nuŋon igane wo njai ago njigane da. ¹⁸Ago yan lo njaisag urat naon ata mel i? Saen njai Kristus ninen o tamolpein naod na njufulale dan, naon tia kawan njupidinaip inj ka dulonj a, nek an mi a. An lo dop njai ka dabai a lo njaisag urat naon njane wan, sen gigin na njiganep ago ka yen a.

Pol man tamolpein fidian sad urat bigabeg a

¹⁹Ŋai tamol ta san urat bigabeg tia ya, an lo seg ilog nam njator dugo kawan njumado da. Ago bo man njai seg iginiag tamolpein fidian sad urat bigabeg njilasag njumado da. Ata wo? Idaisuda tap, tamolpein wei geig ilod njinanep njajal pe Kristus san na mau a. ²⁰Juda adi malad lo njai Juda tamol igo wonj njilasag njumado ya, ata wo, Juda aenta Kristus o ka njajal a. Ŋai Moses san kubiaen paen na ta njumado na da, ago bo man tamolpein a Moses san kubiaen paen na dumado dan njajal san ninen o, seg iginiag go kubiaen paen na njumado dak igo njilasa ya. ²¹Nek ago mi, saen njai gob adi dadi mumado dan, nek ibol tamol ta Moses san kubiaen inj lo tiag imado dak igo wonj, ago njai njumado da. Ago dop an lo njai gob aenta ka njajal a. (Ak man njai Anut san kubiaen ag tia yak ago ta njumado na da, tia, kubiaen a njai paen na njumado dan man Kristus awan aban mi a.) ²²Agod tamolpein a inaned ilo rumok dabai an tia yan malad lo, njai tamol naok ago yak tamolpein amaiak aenta njajal o njilasag njumado ya. Tamolpein naok sen ak fidian malad lo man, njai inaned kagin anak anak njagam njane ya. Man ata wo? Idaisuda tap, dal fidian njibitinaep an lo tamolpein an aenta patud njupasi wa. ²³Kagin en fidian bilaluŋ uyan ak faŋan lo njigane da, ata wo, murnap bar a fidian bilaluŋ uyan amaiak idiraip dilasa wan lo njutou wo ilog ago yen da.

Anj naon uyan ak anjane wo tinim afunip amaspalu wa

²⁴Alonj, kukok tubun ak idu dop lo tamol fidian dumaspalu wa, ago gup tamol kisaek mi inj imug yaup geg fo isudap naon mel inane wa. Nek ago mi ananem madok tan na yak lo, anj fidian tinim afunip ago ka amaspalu wa, ago dop man anj anak anak atem Anut naon ipanaj a. ²⁵Saen tamolpein kukok an lo naon diŋane wo ilod yen tap, inj pitejanek wagai diganep lo tinid sakar ak, aria, an lo inŋsed tinid dam kagin dupani uyanan dop, tubun mi dumaspalu wa. Ago dop inj geg fo disudap naon diŋane wa. Ak man naon an man, ai rouk igo kabuŋad fo dukudi wa, agod an milaen tiap ikurŋak yau a. Ak man id Kris adi idsed tinid pitejanek uyanan tupani wa, ago dop id naon ta a pempem ikurŋak yau

san tia yan tiġane wa. ²⁶Ħai ħaiseg tinig piteġanek uyanan ħupani da. An lo ħai ħaloġ uyan ak, ħai tamol imaspalug dal yapitilig yau dak igo woġ tia ya, tia, ħai nek ibol tamol ta nug dufuni dugo, banin kawan ifu yau na yak ago dam tia ya. ²⁷Tia, ħai seg tinig en ħufuni da, an lo dop tinig en dabai ka ħupani wa. Ħai tinig en nek ibol ħaisag urat pinein igo woġ, ħai ilog ibol dan ago tinig awa yabek igane wa. Kabelan ħai tamolpein aenta Anut san ru ħufulalep duloġ gup, kukok tubun an san taman ipaiag pe ikudag ħau dop ħaineg naon ħiġane san tia banau.

Bitinaek funfun niġen o kagin agane

10 ¹Teig taog, ħai ilog ibol dak aġ mel en ilom isou a. Saen maġanema tubum bagem fidian wagam tan kawan ak ate dutor dila duso se man, timtaen kisaek itunaig ibargiranai se ya, agod iġ fidian Anut iġal go, beig igileg awan sensen yen dugo, titiġaem dudug diau a. ²Fun an niġen o idsad ilo sou man, nek ibol id Kris suguek tiġaneg Kristus da tutumanig tumado dak igo woġ, tubum bagma timtaen an lo, agod beig lo dam, suguek diġane dugo, Moses da dutumanig dumado na ya. ³Saen an lo iġ fidian sisem kumaen panu san anaġ diani dugo, ⁴kumaen panu san you dam duluk se ya. Man dugo, iġ fidian pat tubun ak a kumaen panu lo yak ipalu yan, dida tureġ diabi na ya. Ago dugo you a pat an lo ibanai na yan lo duluk se ya. Agod pat an man nek Kristus. ⁵Ago bo man, Anut tamolpein an wei mi niġedi wo ta imat se na ya. Ago tag tan kawan ak ate dumat na yan, iġaned kisedi an gidigheid dien se ya.

⁶Kulob en wagam mi mok ilasa bo man, tinanou igo Anut isurnai dilasa panad dugo, id teil pe tarer a. Anut ilon man, id nek ibol iġ digane yak igo woġ tia ya, id ilod imasap kagin saiak tigane san niġen o ilod bulbal an, dal nek an lo yabitanad a. ⁷Tamolpein an aenta tubud sewak mitilaedi a ai pat nam digane yan naod na ubou dile se ya, gug aġ ago ta agane na wa. An niġen o ru ta Anut san buk lo igo ibol, “Tamolpein dumasig diani duluk na gug, dumasa dutur go gidigheid dukok ila iso da.” ⁸Agod jeit kagin agane amoi. Saen an lo tamolpein aenta ago diganeg, nal an lo mi Anut tamolpein 23,000 ifug dumat a. ⁹Agod dam, id Anut tusoduduni dop, iġanen dabai nam mel ilod ibol ak ago igane panad o ta tigane na wa. Tamolpein an aenta Anut ago dibitinae dugo, mot wagai ak idirai dilasag dirataig dumat a. ¹⁰Taida mi, aġ aġurġur dan amoi. Tamolpein an aenta duġurġur se ya, an lo dugo eġel ta daoġ panek san ak idug tamolpein amaiak ifug dumat a.

¹¹Mel en fidian tamolpein an fo dilasa san fun man, tinanou naok naok amaiak id tile dop kagin tigane wa. Ru kulob a fidian niġedi wo yan buk lo wagam mi digire ya. Ata wo? Mel saiak saiak a dilasag muruan dupidinai na yan, id tusutip tile dop, kankan uyan ak dupanad a. Saen e

gamu tumado den lo man, saen a lo mel fidian diau dutout an sumeik a. An ninen id kagin saiak ago yak tigane man Anut imoi a. ¹²Ago yan lo, oŋ utur sakar dan ago ilo isou dop man, kagin gane wa, kabelan oŋ udup udeg wau banau. ¹³Oŋ lo bitinaek fidian ilasa dan senamo geig man tia ya, tia, bitinaek naon kisaek an mi dam tamolpein fidian lo ilasa da. Anut kagin ipano wa. Oŋ bitinaek dugo oŋ lo ilasa dan ka sini san idaisuda wa. Man dugo, oŋane dabai dugo woŋ ate bitinaek naok an sayani san ilon uyanan da, an ninen o iŋ bitinaek ta oŋane dabai an iriŋani san amaiak oŋ lo ilasa wo yabituani wa. Agod saen bitinaek ta oŋ lo ipalu tap, dal ta lo oŋ usol wau o ikubiai pano wa, an lo dop bitinaek an lo utur sakar pe mado wa.

Anut mi ubou an ale dop tubud aenta patum apidinai

¹⁴Iŋai turag muroug, fun an ninen o aŋ tubud ai pat mitilaedi ubou ad ale amoi. ¹⁵Aŋ tamolpein kankan am da ya. An ninen o aŋsem mi ru e ŋurupaian den ka akubianip ale wa. ¹⁶Saen id pasa tiŋane dan, gab a tiŋanep ninen o Anut ilo uyan san bar tupani gup lo taluk dan man, idsad lukluk lo Kristus san dar an lo tututou da. Agod bret a tafutep tani dan man, idsad nuaeŋ lo Kristus tinin an lo tututou da. ¹⁷Bret a tafutep tani dan kisaek a. Gidad id wei mi bo man, id tinid fidian Kristus tinin da tutumanig tinid kisaek tilasag tumado ya, man dugo, bret kisaek o lian an id fidian sisem tani da.

¹⁸Aŋ fon Isrel tamolpein sad kagin ilom isou. Iŋ Anut anaŋ yai digane pani an wadan ka diani wa. Saen iŋ ago digane dop, iŋsed tinidi an alta amaiak san Anut da dutumanip kisaek dilasa wa. Aŋ aloŋ la yak an rumok a. ¹⁹Ak dugo, anaŋ a tubud ai pat mitilaedi yai digane pidinai dan, iŋ mel tubun ak ago ŋabol dak i? Tia dugo, ai pat tubud mitilaedi man, iŋ mel rumok ak ago ŋabol di? Tia geig a. ²⁰Ak man aŋ gidad mel en aloŋ uyanan a. Saen gob adi iŋ tubud ai pat mitilaedi an yai digane pidinai dan, Anut iŋsad ubou ta iŋane na da, tia, ur saiak saiak amaiak mi ubou an diŋane da. Amaiak ninen o tubud ai pat mitilaedi sad ubou leil ninen o sen alasa wa. Aŋanem tinimi ur sisaiak dida atumanip kisaek mi alasa man ŋai ŋamoi geig a. ²¹Aŋ Tubun ak san gab lo, agod ur sisaiak sad gab lo dam aluk dop, muruan ta ariŋani san tia ya. Nek ago mi, aŋ Tubun ak san tebol fo, agod ur sisaiak sad tebol fo dam atutou dop, muruan ta ariŋani wak, an dam ago agane san tia ya. ²²Ak dugo, idsad kagin nam Anut tiganep ilon imasap turak susak igane wak i? Tia dugo, idaned tuod iŋanen tuon iriŋani dak i?

Kagin fidian agane dan, Anut ilo uyan apani wo ago agane wa

²³Aŋ imug igo abol, “Mel dugo ninen o ŋamat dan ago ka ŋigane wa.” Awo, an rumok a, ak man mel a fidian ŋai ka ŋigane wan lulunad lo mel

wei mi lou amad tia ya. Rumok, an ilom ibol dak ago ka agane wa, ak man kagin an aenta ananem ilo rumok dabai ipani san tia ya. ²⁴An ninen o ru en aganuri wa. Talpein inanen madok mi uyan ilasa wo urat ta igane na wa. Tia, tamolpein aenta ilo uyan ipidinai o urat igane wa.

²⁵Aria, mudan a didaen aben na diganeg yen dan ninen o igo njabol da, an ka adad pe ani wa. Ilom ta weiwei na dop kankan saian ak fidian mudan an ninen o abal yau a. Gidad mudan naok an didaen tamol dugot na digane yan, fun alon o asumianai san urat ta ipanay na wa. ²⁶Man dugo, tan en Tubun ak san, agod mel tan en lo yen den dam fidian inisan mi a.

²⁷An ninen talpein ta igiop inisan ab lo anay wani wo wau dop, awan wabi wo ilo ibol tap, on gidad inisan anay a ikubuneg nao na igansi an ka wani wa. On anay an ninen ilo ta weiwei dop, an tubud sewak adi sadi ak ubol pe, fun ulon o sumiaek ta gane na wa. ²⁸Ak man saen talpein ta ibol, “Mudan en tubud sewak adi yai digane pidinai a,” ago ibol tap, an wani umoi. Agop an lo on talpein an binawi dop inanen kankan dam ta kubuli na wa. ²⁹Onane kankan kubuli wo ago njabol man tia ya. On ulon la yak, mudan an muruan ipano san tia ya. Nai mudan naok en nani san ninen o igo ilog isou da: ata wo tamol sen ak kankan saian anda yan, nai isubanag pe ilog ibol dak ago ngane san tia yak i? ³⁰Saen nai nunuay dan, bubeg lo Anut o ilo uyan ru nupani da, an ninen o nai kankan uyan ak amag da anay an nani da. Aria, ata wo talpein ta, mel a ninen o nai Anut ilo uyan ru nupani dan ninen o uf igane panag dak i? Kagin naok an fun an tia ya.

³¹Ago yak ninen o, on anay wani boi, tia, you uluk boi, tia, dugo dugo gane dan, aenta malad lo Anut inanen girager ganep tubun mi ilasa wo kagin an fidian gane wa. ³²Gidad tamolpein ta in Juda boi, tia, Juda tia boi, tia, Anut anen midaen, on mel ta ganep an lo in lulunad lo talpein kisaek ta yau idu na wa. ³³Kulob fidian a ngane dan lo, tamolpein fidian ilo uyan nupidinai o nibitinae da. Man dugo, naineg kumaen tan en san an kagin nupani wo urat wagai ta ngane na da, tia, naisag urat funfun lo wagai nganep tamolpein fidian nibinawai o nibitinae da.

11 ¹An ninen o nai Kristus san kagin ngam ngane ya. Nek ago mi an dam naisag kagin agam anane wa.

Kagin uyan ak ubou leil lo ya

²Nai an nipitianay da, man dugo, naisag kagin naok naok fidian an pempem ilom isou da, agod pitejanek funfun a gubak mi an banim lo nidiri an ajal go, gamu dam abiai dabai dugo, ari apani uyanan da.

³Nai ilog ibol dak mel en alon uyanan a. Tamol fidian sad gurman man Kristus, pein san gurman man inanen tamol, agod Kristus san gurman man Anut. ⁴An ninen o saen tamol ta in kabunan ituanig imado dugo

gudane*k* igane dan, kagin an lo i*n*san tamol gurman Kristus miai ipani da. Nek ago mi i*n* kabu*n*an ituani*g* imado dugo profet ru ibol ilasa dak tap, dal an lo dam Kristus miai ipani da. ⁵Agod saen pein ta i*n* kabu*n*an kawan^a gudane*k* igane da, tia, kabu*n*an kawan profet ru ibol ilasa dak tap, i*n* iwon tamol ak miai ipani da. Ago igane tap man pein an nek ibol gurman roun didawi yaup an lo miai dupani wak igo wo*n* a.^b ⁶An ni*n*en o pein ta kabu*n*an ituani imoi tap, gidad i*n*anen gurman roun an itute yau a. Ak man pein an gurman idawi yau an miai ifuni tap, an ni*n*en o gidad i*n* kabu*n*an ituani wa. ⁷Tamol i*n* kabu*n*an ta ituani na wa. Man dugo, i*n* Anut san nao *n*ane*k* tamol, agod Anut san girager ikubiai ilasa da. Ago gug pein man iwon tamol ak san girager an ikubiai ilasa da. ⁸Man dugo, Anut pein i*n*aneg ate tamol ta igane na ya. Tia, i*n* tamol tinin i*n*aneg ate pein igane ya. ⁹Agod fon, i*n* tamol i*n*aneg pein san binawek imado wo ago ta igane na ya. Tia, i*n* pein i*n*aneg tamol san binawek igo imado da. ¹⁰Pein i*n* iwon tamol ak paen na imado da, an ni*n*en i*n* kabu*n*an ituani*p* ate ikubiai dile wak i*n* iwon tamol ak paen na imado da. Kagin ago igane dop, an lo e*n*el adi dam ilo uyan ipidina*i* a.

¹¹Ak man saen id Tubun ak san dal tiri dan, pein sen kisaek mi ta itor imado na da, nek ago mi tamol dam sen kisaek mi ta itor imado na da. Tia, pein i*n* tamol da sisem nug dubunawip dumado wa. ¹²Man dugo, wagam mok pein i*n* tamol tinin aenta lo ilasa ya. Ak man gamu tamol i*n* pein tinin lo ilasa da. Agod pein i*n* tamol da sisem Anut banin lo dilasag dumado da, man dugo, i*n* mel fidian idirai a. ¹³A*n* a*n*sem mel en abitinaep ale wa. Ak dugo, pein ta kabu*n*an kawan malak malak Anut igudani tap, an uyan ak i? ¹⁴Tamolpein aenta kagin a ilod lo uyan dubol dan, an dam ago ipite*n*anad da. Man dugo, i*n*aned ilo sou lo, tamol ta gurman roun milaen mi tap, an i*n*sen miai ipani da. ¹⁵Ak man saen pein gurman roun milaen mi idu yau dop man, an mel ta si*n*aokan san mi a. Man dugo, i*n*anen gurman roun man, kabu*n*an ituani wo Anut i*n*aneg ipani a. ¹⁶Ak man a*n* lulu*n*am lo talpein ta ru kagin e *n*urupaia*n* den ni*n*en ma*n* da nug mupei tap, gidad talpein an mel en ilo*n* uyan a, ma*n* kagin naon senamo ak ta mabi na da. Agod Anut san midae*n* aenta fidian dam ago mi digane da.

Tubun ak san ana*n* tani san ru

Mat 26:26-29; Mak 14:22-25; Luk 22:14-20

¹⁷Gamu *n*ai ru kagin taidam *n*urupaia*n* o da. Ak man a*n*anem kagin naok naok a ni*n*edi wo *n*abol dan ni*n*en o *n*ai *n*upitia*n*a*n* san tia ya. Man

^a Grik sad tamol kagin lo man, pein iwod ad da yan yamel misilas san ak ate kabu*n*ad dutuani gup, malak malak lo dutor a. ^b Grik sad tamol kagin lo man, pein iwon an da yak jeit kagin igane dan, i*n* gurman roun didawi yau a, an lo dop pein an malak malak miai dupani wa.

dugo, saen aŋ atumani man aŋanem kagin saiak saiak a agane dan, kagin uyan ak agane dan iriŋani da. ¹⁸Malmalan talpein ru naok igo irupaiaŋ go ŋaloŋ a. Saen aŋ midaeŋ fidian mi apalu atumani dan, aŋ lulunŋam lo gilek sensen dien da. An nag kitek rumok ago ilog rumok da. ¹⁹Mel en ŋai niŋen o ta ilog uraru na ya, pempem Anut san midaeŋ lulunŋad lo gilek aenta dilasap yen a. Man dugo, kagin naok en lo kuai tem tile wak, enti aŋ lulunŋam lo Anut ipitianai da, agod enti dam niŋen o ilon saian da. ²⁰Kulob a niŋen o ŋabol dan igo ya. Saen aŋ Tubun ak san anaŋ ani wo apalug atumani man, anaŋ a ani dan Tubun ak san anaŋ mok tia ya. ²¹Man dugo, tamolpein a gamugo dupalu yan aŋ aenta ta atitianai na da, tia, aŋ anen anen aŋsiganem anaŋ silei nam anig itout a. Talpein ta anaŋ tia imado yan imatigen a, ago dop aenta lukluk tinadi a. ²²Ak dugo, aŋ aŋsiganem ab lo ani aluk dop amado san tia i? Tia dugo, aŋ Anut san midaeŋ an mel kawan ak ilom isou di? Tia dugo, talpein a anaŋ ad tia yan miai apidinai o ilom ibol di? ŋai aŋsam kagin niŋen o dugo ŋabol o? Dugo, aŋ ŋupitianaŋ o? Tia geig a!

Jesus iŋ bret agod wain da iŋaneg megeloum ipidinai a

²³Dugo dugo tiganep, pasa tani taluk san dal man ŋurupaiaŋ la ya, Tubun ak sen kagin an ikubiai panag a. Tubun ak Jesus, tidom a lo ager banid lo digane yan, bret iŋane yabig, ²⁴Anut ilo uyan ru ipani la gug, yafuteg igo ibol, “Bret en ŋaineg tinig, ŋai aŋ niŋemi wo ŋiganeg idu ya. Aŋ igo agane dop ŋai ilom isou.” ²⁵Nek ago mi, anaŋ diani itout gug gab iŋane yabig igo ibol, “Gab en man kontrak foun ŋaisag dar lo ya. Saen en aluk dop ŋai ilom isou.” ²⁶Man dugo, saen dugo dugo aŋ bret en ani dop, gab en lo aluk dop, aŋ Tubun ak san mateŋ niŋen abol ilasa dop yaup saen iŋ imul ipalu wa.

²⁷An niŋen o man, talpein a kankan tia yak igo bret yani, tia, gab lo iluk dan, Tubun ak tinin, iŋanen dar an dam niŋedi wo aupasek igane da. ²⁸Fun an niŋen o talpein sen ikubiani ile la gup, murna bret yanip gab lo iluk a. ²⁹Man dugo, talpein ta imug ilon igirep Tubun ak tinin ta ile ilon na tap, yani iluk dan lo iŋsen tinin fo muruan tubun ak igane isuda wa. ³⁰An niŋen o aŋ lulunŋam lo tamolpein aenta dabai amad tia ya, aenta subam ifu da, agod aenta dumat la ya. ³¹Ak man id imug sed ikubianad tile tap, Kristus bitinaek lo ta idirad na wa. ³²Gug aŋ mel en aloŋ uyan a. Rumok, idsad Tubun ak bitinaek lo idirad dugo bu ipanad da. Ak man iŋ id kududod yabi wo ago igane da, an lo dop saen iŋ tan en san tamolpein daon ipidinai dan te id iŋ dida itumanad pe sisem ipitiŋinad san tia ya.

³³ŋai teig taog, fun an niŋen o kagin igo ari wa. Saen aŋ anaŋ ani wo apalup atumani man, gidad nug atitianip sisem anaŋ ani wa. ³⁴Talpein ta imatigen saian tap, gidad imug iŋsinan ab lo anaŋ yani gup ipalu wa. An lo dop aŋanem tumanek san nuŋon man, Anut ibitianaŋ pe muruan ipanaŋ san tia wa.

Aria, saen ɲai anɟsam na ɲupalu man ru kagin aenta dam ɲurupaianɟ a.

Urgun lou panek iwae panad da

12 ¹ɲai teig taog, aɲ Awan Urgun san binawek ipanad dan niɲen o aɲaonɟ man ɲai ilog ta ibol na da. ²Aɲ alonɟ ak, saen aɲ wagam gob amado yan, aɲanem tamol kagin wagam an naom diraeg an lo tubud sewak adi a awad tia yan sad ubou ale se ya. Ago yan lo ur saian saian an aɲ diɲilianɟ go kagin uyan tia yan naon sensen dukubiai ale na ya. ³Amaiak niɲen o ɲai ɲurupaianɟ da. Talpein ta Anut anen Urgun lo Jesus imisilani san tia ya. Nek ago mi, talpein a igo ibol dan, “Jesus inɟ Tubun ak,” tamol amaiak Awan Urgun lo mi inɲenɟ da. Man dugo, ur saiak ta ago ibol ilasa san tia ya.

⁴Aria, Awan Urgun tamol anen anen atem lou panek naon sensen ipidinai da. Ak man Awan Urgun e binawek en iwae pidinai den man kisaek a. ⁵Nek ago mi id anen anen atem dal wei mi sensen lo Tubun ak o urat ka tigane wa, ak man Tubun ak e inɟsan urat tigane den man kisaek a. ⁶Taida mi, Anut tamolpein anen anen biabi binawek naon sensen ipidinai da, ak man Anut e tamolpein fidian ilod lo binawek en idirai dilasa den man kisaek a.

⁷Aria, Awan Urgun tuon man id tinid ilon lo walal isi dugo tile da. Ak man inɟ id anen anen atem dabai naon senamo ak ipanad da, an lo man id anen anen dabai a tiɲaneg tabi dan urat tupani wa, ago dop an lo id fidian sisem uyan tiɲane wa. ⁸Urgun san dabai log, talpein ta ru kankan milaen anda yak inɲane dugo, Urgun naon kisaek an lo mi, talpein sen ak ru maɲau anda yak inɲane da. ⁹Ta Urgun anen dabai lo ilo rumok tubun ak inɲane dugo, ta Urgun kisaek mi lo subam adi ikubuniai san dabai inɲane da. ¹⁰Ta kulob girager naok naok igane san dabai inɲane dugo, ta profet ru ibol ilasa san dabai inɲane da. Ta ilon lo ur uyan ak ur saian ak itarpasai san dabai inɲane dugo, ta tamolpein sen ak sad muroud ru lo inɲenɟ san dabai inɲane da. Agod ta inɟ muroun ru naok ago yan ilonɟ dugo fun ibol ilasa san dabai inɲane da. ¹¹Lou panek emaiak fidian man Urgun kisaek mi ipanad da, agod en inɟsen ilon ibol dak ate mi tamol kisaek kisaek iwae pidinai da.

Tinik kisaek mi, gug tinik san boi wei mi a

¹²Tamol tinin kisaek a, ak man inɟsan ɲien, banin, tinin aenta dam fidian wei a. Agod tinin aenta an fidian dutumanig tinin kisaek mi ilasag yen da. Kristus dam nek ago ya. ¹³Man dugo, id fidian Ur kisaek mi nam suguek tiɲaneg, an lo tutumanig tinik kisaek tilasag tumado da. Gidad id aenta Juda, tia, aenta Juda tia yak, aenta urat bigabeg adi, aenta kawan tumado tator da, Anut id fidian Urgun kisaek mi lo taluk o ipanad a.

¹⁴Aria, tinid boi kisaek man tia ya, tia, tinid man boi wei mi a. ¹⁵Ak dugo, ɲai ɲieg igo ibol, “ɲai banig tia ya, an niɲen o ɲai tinig en san boi

tia ya,” ago ibol tap, rumok, iŋ tinik an iŋanen boi mok tia i? ¹⁶Tia dugo, kududo dam igo ibol, “Ŋai malag tia ya, an niŋen o ŋai tinig en san boi tia ya,” ago ibol tap, rumok, iŋ tinin an iŋanen turan mok tia i? ¹⁷Tia, tinik an fidian malak mi tap, an niŋen o dugo woŋ ru ilonŋ ak i? Tia, tinik an fidian kududok mi tap, dugo woŋ mumalun iwen ilonŋ ak i? ¹⁸Ak man rumok, Anut iŋanen ilon yen ak iri panim, tinid san boi anen anen atem iŋaned abed kisaek kisaek ipidinaig dien yau a. ¹⁹An niŋen o tinid an gigin kisaek mi yen tap, tinid an nuŋon tia ya. ²⁰Amaiak niŋen o tinid anen boi wei mi a, ak man fidian dutumanig tinid kisaek ilasag yen da.

²¹Malad iŋ banid irupei, “Ŋai oŋ ŋamoi a,” ago ibol san tia ya. Nek ago mi kabuŋad dam iŋ ŋied irupei, “Ŋai oŋ ŋamoi a,” ago ibol san tia ya. ²²Tia, tinid sad boi aenta a dabai an tia yak tabol dan, iŋsad urat tubun geig a, an lo tinid boi boi an ta dien na tap, tinid an imat a. ²³Tinid aenta man tile uyan san tia ya, an niŋen o tamol iŋ tinin an damag ipani da. Damag nam ibalfutani da, ago dop san leil man uyanan a. Agod tinid aenta man malak malak tile san tia ya, an niŋen o iŋ imiani uyanan da. ²⁴Ak man talpein tinin a leil lo uyanan an iŋ damag ta ipidinaŋ na da. Man dugo, dal an lo Anut tinid sad boi fidian itumanai a, tinid sad boi a leil lo uyan tia yan, yaŋad tisini da. ²⁵Anut kulob ago igane yan lo, gilek ta tinid lo yan ta yen na wa, an lo dop tinid sad boi fidian nug kagin dupani uyan a. ²⁶Fun an niŋen o saen tinin aenta an kisaek madai ile tap, tinin aenta dam muruan naon kisaek an disini wa. Agod fon talpein tinin ta kisaek niŋen o ilon uyan tap, tinin aenta an fidian ilod uyan a.

²⁷Aria, aŋ fidian man Kristus tinin, agod iŋanen tinin san boi fidian man aŋsem mi a. ²⁸An lo man tamolpein fidian Kristus san midaeŋ ilon lo mi urat digane wa. Agod Anut urat tamol naon sensen itarpasai da. Malan te mok iŋ aposel adi ipilianai a, agod tinin te profet adi ipilianai a. Uraru an tinin te man girek maŋau adi, an patun fo man talpein a kulob girager urat digane dan, an patun fo talpein a subam dupasi yau san dabai ad da yan, talpein a tamolpein aenta dibinawai san dabai diŋane yan, tulek tamol adi, tia, pein tulek san dabai diŋane yan, agod murna geig man, talpein a tamolpein sen ak sad muroun ru ka diŋiŋeŋ a, ak man ru an fun ta duloŋ na wa. ²⁹Ak dugo, talpein Kris ak fidian aposel adi ak i? Tia, an fidian profet adi ak i? Tia, an fidian girek maŋau i? Tia, an fidian kulob girager ka digane wak i? ³⁰Tia dugo, an fidian subam digane itout san dabai diŋane yak i? Tia, an fidian muroun ru sensen ak fun ta duloŋ na yan lo ka diŋiŋeŋ ak i? Tia, an fidian ru naok ago yan san fun ka duloŋ pe dubol ilasa wak i? Tia geig a. ³¹Bar en fidian uyanan a, ago gug aenta uyanan geig a. An niŋen o aŋ tinim ŋutum lo bar a aenta diriŋanai dan aŋal pe urat apidinaŋ san niŋen o yaes ifunaŋ a.

Ilo panek an mel malan te ya

Aria, ŋai gamu aŋ kagin dugon iŋ uyanan geig ak agane san ŋukubiaip ale wa.

13 ¹Ŋai tamol in enjel da sad balek sensen lo nŋen ka nŋane wa, ak man ŋai ilo panek ag tia yak tap, ŋai nek ibol liliŋan tubun ak tamolpein kududod lo uyan tia yak, tia, dou ta a tamol isue saian dugo liliŋan kawan ilasa yau dak igo woŋ a. ²Ŋai profet ru ka ŋabol a, agod mel mianuk ak fidian fud ŋalon uyan a, agod taida mi ŋai maŋau fidian amag da ya, agod ŋaisag ilo rumok lo mi ŋabol pe tan bubun ta isuk yaup asau mi itur a, ak man ŋai ilo panek amag tia yak tap, ŋai tamol kawan mi a. ³Ŋai ŋaisag filiag an ŋuwaep tamolpein a melmel amad tia yak diŋane wa, agod ŋai tinig en ager banid lo ŋiganep yai lo dimiriag a, ak man ŋai ilo panek amag tia tap, urat naon taidam nŋane san tia ya.

⁴Ilo panek kagin in muruan fidian isini da, agod ilo panek kagin dam tamolpein fidian ilon imuŋanai da. Ilo panek kagin in malan ta isi na da, sen ta ipitiani na da, agod sen yaŋan ta yabisa na da. ⁵Ilo panek kagin in kagin naok saian ak ta igane na da, inŋen mi wo ilo sou ta igane na da, in ririan ilon imasap ta tiŋaen saian na wa, in muruan a tamolpein dupani an ta ilon isou na da. ⁶Ilo panek kagin san leil lo man, kagin saiak an ta bulbal na ya, tia, ru a rumok an nŋen o mi uyasuai iganep imado da. ⁷Ilo panek kagin man pempem aenta ibargiranai dugo, pempem ilon lo rumok da, agod pempem mala nouk imado dugo, pempem muruan lo itur sakar da.

⁸Ilo panek kagin pempem yen da, itout yau san tia ya. Ak man tamolpein gamu profet ru dubol ilasa bo man, murnap profet ru an itout yau a. Gamu talpein aenta tamolpein sen ak sad muroun ru lo diŋenŋen dak gug fun ta dulong na da, ak man murnap kagin an itout yau a. Agod gamu aenta Urgun san dabai lo in maŋau amad da ya, ak man murnap lou panek an itout yau a. ⁹Man dugo, gamu idsad maŋau ta idaisuda na ya, an lo id talon ak man kitek uyan a. Taida mi, id profet ru mi kitek ka tabol ilasa wa. ¹⁰Ak man murna dop saen nal a lo mel fidian itaotan dilasap yen dan ipalu man, kagin a kitek itaot an fidian ditout diau a. ¹¹Saen ŋai nanuk tusag man, ŋai nanuk igo woŋ nŋenŋen se ya. Agod ŋai nanuk igo woŋ ilo sou nŋane dugo ilog igire se ya. Ak man saen ŋai tamol tubug man, ŋai nanuk sad kagin nŋane se yan fidian patug nupani a. ¹²Gamu man id ka aban kitek tile da, nek ibol tig siŋaokan tia yak lo mitilaen kuai te ta tile na dak igo woŋ a. Ak man murna dop id Anut da nug naon tupanip nug tile wa. Gamu ŋai maŋau kititik amag da ya, ak man murna dop ŋaisag maŋau Anut nŋen o man idaisuda wa, nek ibol Anut sen ŋai ilon uyanan ak igo woŋ a.

¹³Ago yak nŋen o mel utol en dien diau da, ilo rumok, mala nouk, agod ilo panek. Ak gug mel utol en lulunad lo ilo panek mi in malan te ya.

Profet ru in balek sensen ak da

14 ¹Aŋ ilo panek san dal mi ari apani wa. Ak man aŋ dam urat wagai agane dop Awan Urgun san dabai lo binawek sensen

ipanaŋ an aŋane wa. Ak man mel malan te man aŋ Anut asumiani dop, profet ru abol ilasa san dabai ka ipanaŋ a. ²Man dugo, talpein ta tamolpein sen ak sad muroun ru lo iŋiŋeŋ dak gug, fun ta ilon na dan, iŋ tamolpein aenta ta irupidai na da, tia, iŋ Anut mi irupe i da. Rumok, tamolpein ru an fun ta dulon na da, man dugo, iŋanen ur nam melmel a mianuk lo dien dan mi ibol ilasa da. ³Ak man, tamolpein ensauta a profet ru dubol ilasa dan, tamolpein aenta durupidai dulon da, an lo dop dabai dupidinaip, ilod diabisa dop didiraip bubed maror anda dumado wa. ⁴Talpein iŋ balek naon sen ak lo, ru fun ta ilon na yak lo iŋiŋeŋ dan, iŋ mi sen ibinawi da. Ak man talpein a iŋsinan muroun ru lo profet ru ibol ilasa dan, iŋ midaeŋ an fidian ibinawai dugo iŋaned dabai nen igane isuda yau da. ⁵Rumok, aŋ anen anen balek ru sensen ak lo ka aŋiŋeŋ o ŋai ilog ibol da. Ak man gidad, ŋai ilog tubun geig ibol dak aŋ fidian ka profet ru abol ilasa wa. Talpein enti profet ru ibol ilasa dan, iŋ talpein a balek sensen ak ate iŋiŋeŋ dan iriŋani da. Ak man talpein balek sen ak lo iŋiŋeŋ dop fun dam ifulalep tamolpein kuai tem dulon tap, iŋ talpein a profet ru ibol ilasa dan da naon kisaek a, man dugo, iŋ dam midaeŋ fidian dabai ipidinai da.

⁶Aria, teig taog, ŋai aŋsam na ŋupalup balek ru sen ak lo mi ŋiŋiŋeŋ dop alon tap, kagin an dugo woŋ ibinawaŋ ak i? Ak man ŋai mel ta ŋioŋamin lo Anut ikubiai panag an, tia, maŋau foun ak ta, tia, profet ru ta, tia, ru ta maŋau ipiteŋanaŋ dan ŋupanaŋ tap, kagin an mi nuŋon anda ya. ⁷Aŋ melmel e kumaed tia en, dum boi, tia, digadug boi, liliŋan digane ilasa dan niŋedi wo ilom isou wa. Talpein iŋ digadug ibali saian dop man digadug san liliŋan talon uyan san tia ya, ago dop liliŋan an tamolpein ditari san uŋaon ipidinai a. ⁸Tia, talpein ta iŋ ager san dou bilaluŋ isue wa, ak man iŋ bilaluŋ isue saian tap, enti iŋ wagai yau san tawaŋ iganep imado wak i? ⁹Nek ago mi, saen oŋ balek ru fun ta ulon na yak lo ŋiŋeŋ tap, en dugo woŋ tamolpein oŋane ru a ubol ilasa dan fun dulon ak i? Oŋane ru an nuŋon tia wa. ¹⁰Rumok, tan en lo man muroun ru wei mi dien da, ak man muroun ru fidian an lulugaŋ lo ta kisaek iŋ fun an tia yak ta yen na da. ¹¹Ago yan lo, gidad talpein ta muroun ru lo iŋiŋeŋ da, ak gug ru e ibol den fun ta ŋiŋane na tap, iŋsan leil lo ŋai nek ibol tamol gol ak igo ŋumado da, agod iŋ dam ŋaisag leil lo tamol gol ak igo woŋ imado da. ¹²Aŋanem tumanek lo kagin naok ago yan dam yen da. Amaiak niŋen o ŋurupaiaŋ da, aŋ fidian ilom tinim imasag, Urgun san lou panek aŋane wo ilom tubun mi ibol dan niŋen o, lou panek a aŋanem midaeŋ dibinawaip dabai ad da dumado wan mi aŋanep, tinim iŋanefute wo maeg aganep aŋane wa.

¹³Fun an niŋen o talpein iŋsan ŋiŋeŋ fun ta ilon na yak lo iŋiŋeŋ tap, gidad iŋ Anut isumiani dop ru fun ilon pe ibol ilasa san dabai an ipani wa. ¹⁴Man dugo, ŋai balek ru sen an fun ta ŋalon na yak lo ŋugudani

tap, ɲaineg ɲutug mi igudani da, ak gug ɲaineg kankan an nuɲon an tia ya. ¹⁵An niɲen o en dugo tigane wak i? Saen ta man ɲaisinag ur san ilobol fom gudanek ɲigane wa. Agod saen ta man ɲaisinag ilo sou lo mi gudanek ɲigane wa. Nek ago mi, saen ta man ɲaisinag ur san ilobol fom bar ɲabi wa, agod saen ta man ɲaisinag ilo sou lo mi ru ɲaloɲ ak lo bar ɲabi wa. ¹⁶Ak dugo, oɲ balek ru sen ak fun ta uloɲ na yak lo Anut yaɲan wabisa dak tap, talpein a oɲsa midaeɲ lo gamugo iladu dan, oɲsa gudanek an dugo ibinawi wak i? In oɲsa gudanek ilon pe “rumok” ago ibol san tia ya, man dugo, gudanek a gane dan fun ilon san tia ya. ¹⁷Rumok, dag oɲ Anut yaɲan wabisap ilo uyan pani uyan da, ak man oɲ talpein en ta binawi na da.

¹⁸ɲai Anut ilo uyan ru ɲupani da, man dugo, dabai a Anut ipanag an lo ɲai balek sen ak ate ɲiɲiɲeɲ dan, dabai a aɲ kagin kisaek an mi agane wo ipanaɲ an iriɲani da. ¹⁹Ak man gidad, saen ɲai tumanek lo ɲumado tap, ɲaisag ru en tamolpein aenta ipiteɲanai o ɲamat da. Fun an niɲen o gidad ɲai ru wei an tia tamolpein duloɲ uyan san an mi ɲufulale dop in duloɲ a, kabelan balek ta lo ɲai ru wei mi ɲiɲiɲeɲ dop in diɲaoɲ banau.

²⁰Teig taog, aɲ nanuk igo woɲ ilom ago isou yau dan amoi a. Aɲ nek ibol nanuk adi kagin saiak digane san ta duloɲ uyan na yak igo, aɲ dam kagin naok an lo uɲaoɲ am amado wa. Aɲanem kankan lo man, aɲ nek tamol busumak igo woɲ amado. ²¹Aisaia san girek lo tamolpein a Anut awan duparsisali se yan niɲedi wo irupaiaɲ da. Anut igo ibol,

“Tamolpein balek sensen diɲiɲeɲ dan lo,

agod tamolpein gol ak awad lo dam,

ɲaineg tamolpein ru ɲurupidai a.

Ak man gidad ɲai ago ɲigane bo man,

in ɲai awag ta diabi na wa.”

²²An niɲen o, balek sen ak tamolpein fun ta duloɲ na yan lo diɲiɲeɲ dan, Anut tuon kuai tem kob ta ilo rumok adi kulob an ta ikubiai pidinai na da, tia, kulob an man tamolpein a ilod lo ta rumok na yan inɲad mi a. Ak man, profet ru an ilo rumok an tia yak inɲad man tia ya, tia, profet ru an ilo rumok adi inɲad mi a. ²³Amaiak niɲen o, saen midaeɲ dutumani man, tamolpein ilod lo rumok tia yak boi, tia, tamolpein maɲau tutubun tia yan boi, in tumanek lo diladu dugo, aɲsam balek lo ru fun ta duloɲ na yak ate aɲiɲeɲ dop duloɲ tap, in ilod lo aɲ ɲiɲeɲ burau agane dak ago dubol a. ²⁴Ak man saen aɲ fidian profet ru abol ilasa dugo talpein ta patun fo yak aɲsam tumanek lo ipalu tap, ru fidian e ilon den ilon isue dop in kuai tem ile wak in aupasek tamol. ²⁵Agod mel a buben ilon lo imianuk an fidian dutufulal pe walal te dien dop ile wa. An niɲen o in yau idup Anut ubou an ile dop igo ibol, “Rumok, Anut aɲ da amado da!”

²⁶ɲai teig taog, gamu aɲanem tumanek lo kagin uyanan agane san niɲen igo ɲurupaiaɲ da. Aɲ anek anek atem mel ka agane wa. Tamol ta

in̄ bar in̄ane ipalu wa, tamol ta pitejanek ibol ilasa wa, tamol ta in̄ Anut san na ru ilon̄ pe tamolpein irupidai dulon̄ a, tamol ta in̄ balek ru fun ta ilon̄ na yan lo in̄in̄en̄ ilasa wa, agod tamol sen ak in̄san ru an fun ibileksa da wa. An̄ kagin nek an̄ an̄sam midaen̄ dabai ipidinai o mi agane wa.

²⁷Saen an̄ lulun̄am lo tamolpein aenta ru fun ta dulon̄ na yak lo diin̄in̄en̄ tap man, gidad amoip talpein uraru boi, tia, utol boi, ago ka diin̄in̄en̄ a, subun̄an taida man tia wa. Agod in̄ sisem ta diin̄in̄en̄ na wa, tia, ta imug in̄in̄en̄ yaup itout gup, tinin te ta ibol ilasap, ago iri iri wa. Taida mi, talpein sen ak in̄sad ru ibileksa san dam imado wa. ²⁸Ak man talpein ta in̄ atna ru ibileksa san tia tap, in̄ tumanek lo ta diin̄in̄en̄ na wa. In̄ Anut da ka diin̄in̄en̄ ak, agod nek in̄sed ilod lo mi diin̄in̄en̄ a.

²⁹Aria, saen profet adi midaen̄ durupidai dop man in̄ uraru boi, tia, utol boi ago diin̄in̄en̄ a. Ago dop tamolpein aenta man kududod mi dugurep ru dubol ilasa dan dukubianip dile uyan a. ³⁰Ak man saen Anut n̄in̄en̄ ta tamol sin̄ire na yan ikubiai panip ibol ilasa tap, talpein a imug in̄in̄en̄ an̄ imoip awan itau kisaek on̄ dop, tamol neinta an̄ ka in̄in̄en̄ ilasa wa. ³¹Man dugo, an̄ fidian ka profet ru abol ilasa wa, ak man kisaek imug in̄in̄en̄ itout gup, fon sen ta in̄in̄en̄ da wa. Dal en lo an̄anem tamolpein fidian pitejanek uyanan diin̄ane dop, bubed yabisap dumado wa. ³²Kabelan an̄ ilom lo tamol Anut awan ilon̄ dan ririan ru ibol ilasa dak ago abol banau, ago tia ya. Man dugo, Anut anen profet adi dabai ipidinai an lo in̄sed n̄utudi ka ditirni wa. An n̄in̄en̄ o in̄ Anut awan dulon̄ an ilod lo yen yaup in̄aned saen ilasa dan te gup, ru an tumanek lo dubol ilasa wa. ³³Man dugo, Anut man in̄ sun̄un̄ek san Anut tia ya, tia, in̄ maror san mi a.

³⁴An̄sam tumanek lo pein n̄in̄en̄ ta digane na wa. Man dugo, kagin naok ago yak panu panu midaen̄ aenta lo ago digane yau da. Man̄ in̄ tumanek lo diin̄in̄en̄ man mamoi a. An n̄in̄en̄ o nek ibol kubiaen̄ ibol ak ago, in̄ iwod tamol ak paed na mi dumado wa. ³⁵Agod in̄ mel ta n̄in̄en̄ o dumat pe dusumiai tap, in̄ dumul ab lo diau gup iwod tamol ak dusumianai dop ru an fun durupidaip dulon̄ a. Man dugo, saen pein ta tumanek lo malak malak in̄in̄en̄ tap, in̄sen m̄iai ipani da.

³⁶Ak dugo, an̄anem tumanek in̄ aben a dugon te Anut san ru imug ilasa ya, an rumok ak i? Tia dugo, Anut san ru panu panu aenta lo ta yau na ya, tia, an̄sam na mi yau a, an rumok ak i? ³⁷Talpein ta in̄ ilon lo in̄sen profet ak ibol, tia, in̄ ilon lo Awan Urgun lo bar dabai ak in̄ane ibol tap, in̄ gidad mel en ile ilon̄ pe ilon kisaek a, ru e n̄ai n̄igireg an̄sam na n̄iganep ipalu wo den man Tubun ak awan n̄igire da. ³⁸Ak man talpein an ru e n̄igire den n̄in̄en̄ o ikikai tap, an n̄in̄en̄ o saen in̄sen in̄in̄en̄ man an̄ kududom ta agure na wa.

³⁹Aria, mel en n̄in̄en̄ o n̄ai ru wadan n̄urupaian̄ da. An̄ ilom tinim imasap profet ru abol ilasa wan n̄in̄en̄ o tubun mi amat a. Agod

tamolpein aenta balek ru fun ta duloŋ na dan lo diŋiŋeŋ san aŋ ta apadau na wa. ⁴⁰Ak man mel fidian agane dan aŋ kagin itaot agod kagin uyanan ak lo mi agane wa.

Kristus imat go fon kumaen imasa da ya

15 ¹Ŋai teig taog, gamu ŋai bilaluŋ uyan ak e imug ŋabol aloŋ en niŋen ilo sou ŋupanaŋ o ŋamat da. Bilaluŋ uyan en aŋ banim afulaleg aŋane dugo bag an fufo aŋanem madok Kris ak aganeg dabai anda yen da. ²Aŋ ru a gubak mi ŋufulale panaŋ an mi abi sakar tap, bilaluŋ uyan en lo Anut patum ipasip iniliaŋ a. Aŋ ru an fidian abi yau dak i? Tia dop, aŋanem ilo rumok an kawan a.

³Mel fidian ŋai kududog ilon an ŋaisag leil lo malan te ya, an niŋen o ŋai mel tutubu yan fidian aŋ ŋurupaiaŋ a. Ŋai igo ŋabol a. Ru ta Anut san buk lo yen dan iri panim, Kristus idsad aupasek isuas o imat a. ⁴Agog iŋ disareg nal utol yau gug fon Anut mateŋ lo ifufuni yabisag kumaen ilasa da ya. Agod an dam ru ta Anut san buk lo yen dan iri panim nuŋon ilasa ya. ⁵Agog malmalan Pita naon na walal isi a, agog tinin te megeloum 12 an naod na dam kuai tem ilasa ya. ⁶Agog murna iŋ fon walal isig malak malak dile ya, atna ilo rumok adi iŋ dile yan sad sutek 500 iriŋani a. Tamol a iŋ dile yan kisaek kisaek dumat la ya, ak man wei mi gamu dumado yau da. ⁷Murnag Jems san na ilasa ya, agog fon aposel fidian sad na dam ilasa ya. ⁸Agog murna geig man ŋaisag na ilasa ya. Ŋai man nek ibol nanuk foun gamugo dugo tinan ririan igansi ak igo woŋ a, agog bo man Jesus sen ikubiai ŋile ya.

⁹Man dugo, ŋai Kristus san aposel aenta luluŋad lo yaŋag tia ya, agod ŋai yaŋag aposel dubol dan ta idaisuda na ya. Man dugo, ŋai Anut anen tamolpein ŋusubanai o ŋukudai dugo muruan wei mi ŋupidinai se ya. ¹⁰Ak man Anut san ilo muŋanek log gamu ŋai iŋsan urat tamol mok ŋumado da. Agod taida mi, iŋsan ilo muŋanek ŋai ipanag an nuŋon ifu a, man dugo, ŋai urat wagai geig ŋigane se ya, an niŋen o ŋaisag urat wagai ŋigane dan aposel aenta fidian sad urat iriŋani a. Ak man ŋai seg kisaek urat ta ŋigane se na ya, tia, Anut iŋ ŋai da ya, iŋanen ilo panek an ŋai urat ŋigane wo dabai ipanag se ya. ¹¹Aria, gidad ŋai ru ŋurupaiaŋ go aloŋ se ya, tia, aposel aenta ru dubol go aloŋ se ya, ru a maŋ fidian murupaiaŋ go aloŋ se yan naon kisaek mi ya, agod ru en niŋen o mi aŋ gubak mi ilom lo rumok a.

Tamolpein afon kumaed dumasa wak san ru

¹²Aria, maŋ Kristus mateŋ lo fon kumaen imasa da yan murupaiaŋ se yan rumok tap, en ata wo aŋ luluŋam lo tamolpein aenta, tamolpein a dumat la yan iŋ fon kumaed dumasa san tia dubol dak i? ¹³Kududom agure uyanan a. Tamolpein a dumat la yan fon kumaed dumasa san tia

yak abol man, an nigen o Kristus dam kumaen ta imasa na ya. ¹⁴Ago yak nigen o, Kristus fon kumaen ta imasa na yak man, maŋsama ru mufulale panaŋ se yan kawan a, agod aŋanem ilo rumok an dam kawan a. ¹⁵An lo man, taida mi ru a gubak mi Anut nigen o mabol se yan ru sewak mi a. Fun an nigen o Anut malan lo maŋ sewak tamol mi a, man dugo, maŋ gubak mi malak malak ru igo mabol ilasa se ya, Anut mi Kristus mateŋ lo ifufunig fon imasag gamu kumaen imado da. Gug tamolpein a dumat la yan fon kumaed dumasas san tia ya, an rumok tap, aria, Anut Kristus ta ifufunig fon kumaen imasa na ya. ¹⁶Man dugo, nek ibol ŋai gubak mi ŋurupaiaŋ ak ago, Anut tamolpein dumat la yan, fon kumaed ta idirai dilasa na dak man, iŋ Kristus dam mateŋ lo ta iŋane imul na ya. ¹⁷Aria, Kristus fon ta kumaen imasa na yan lo man, aŋanem ilo rumok an kawan a, ago tag Anut aŋanem aupasek ta ipare idu na ya. An lo murnap aŋ adeg au a. ¹⁸Taida mi, tamolpein a Kristus ilod lo rumok go dumat la yan, iŋ dam dideg diau a. ¹⁹Fun an nigen o ŋai igo ŋurupaiaŋ da. Idsad mala nouk Kristus lo yan tan en lo mi ka ibinawad a, an rumok tap, man id buraurau geig a. An lo man tan en san tamolpein, rumok, tamolpein aenta ilod kitek imuŋanai a, ak man id niŋed o mi ilod tubun geig imuŋanad a.

²⁰Ak man Anut Kristus ifufunig yabisag fon kumaen imado dak, an ru rumok a. Kristus iŋ malmalan mateŋ lo kumaen imasa ya, kulob an lo idsad mala nouk an, tamolpein a gamu mateŋ lo ŋioŋ diabi dan murnap fon dumasap kumaed dumado wan, nuŋon ilasa wa. ²¹Nek ibol tamol kisaek mi lo mateŋ ilasa yak ago, tamol kisaek mi lo dam tamolpein a dumat la yan fon kumaed dumasas da wa. ²²Id fidian man Adam malan kubulan, an nigen o id fidian tamat a. Nek ago mi, tamolpein a fidian Kristus lo dumado dan, Anut murnap ifufunaip fon kumaed dumasas da wa. ²³Ak man id anen anen atem idsad saen lo mi a. Kristus sen malmalan imasa la ya, agog iŋ patun fo, saen afon tan en lo imul ipalu dan, tamolpein a iŋsan an fidian fon kumaed dumasas da wa. ²⁴Murna gup saen wadan ipalu wa. Ak man saen an gamugo dop Kristus tamol gurman fidian, tamol yaŋad anda yak, agod dabai funfun an fidian iŋ ibiai dudu dop iŋ abed iŋane wa. Agod wadan geig man iŋ iŋsan tamolpein iŋal pe Taman Anut banin lo idirai a, ago dop Kristus sen iŋaned gurman imado wa. ²⁵Man dugo, Kristus mi tan en lo kiŋ imadop yaup, Anut Kristus san ager an fidian ibiai dudup Kristus ŋien paen na^c dumado wa. ²⁶Ager wadan Anut yabi idu man mateŋ. ²⁷Aria, rumok, Anut san ru igo ibol, “Anut mel fidian idiraig nanun ŋien paen na dien a.” Ak man ru an ago ibol bo man, id ilod itarpasi ak, ru an Anut

^c Wagam na saen tamol gurman wagai lo iŋanen ager tamol aenta ibiai idu dop man, saen iŋ sia kiŋ fo imasi dan te, iŋsan ager gurman an ŋien paen na imadog itokubol go ago yen a.

enti mel fidian idiraig nanun njen paen na dien an dam ituani man tia ya. ²⁸Tia, saen Anut mel fidian Kristus paen na idiri itout gup man Kristus sen Taman Anut paen na imado wa. Saen an lo Anut inſen mi malan te geig a, inſ mi mel fidian sad tamad imado wa.

²⁹Aria, tamolpein dumat la yan fon kumaen ta dumasa na wa, an rumok tap, tamolpein a talpein dumat la yan faſan lo suguek diſane dan, niſedi wo dugo tabol ak i? Tamolpein dumat la yak fon kumaen dumado san tia ya, an rumok tap, aria, ata wo tamolpein sen ak inſ faſan lo suguek diſane dak i? ³⁰Agod aſ maſ apoſel adi niſema wo ilom isou wa. Ata wo nal fidian lo maſſema iginiama yai ided lo mau dak i? ³¹Teig taog, ſai idsad Tubun ak Jesus Kristus lo ſumado dugo aſ yaſam ſisini da. Aria, ru an ru rumok ago tap, ru en dam ru rumok a, ſai nal fidian ſamat da. ³²ſai etna Efesas na tamol wei mi bor kaſik igo woſ dida nug mabi ſe ya. An tan en san mel mi ago tap, an dugo woſ ſai ibinawag ak i? Tamolpein dumat la yak fon kumaen ta dumasa na wa, an rumok tap, gidad ſai ka Anut ilog inſaon pe igo ſabol a,

“Id gamu anaſ mi tani taluk dop tumado wa,
man dugo, gabulop id tamat a.”

³³Aſ ſem irawaſ amoi, saen aſ tamolpein sad madok uyan tia yak dida ator tap, inſ aſanem kagin uyan an duſuſuſi wa. ³⁴Malam ipuk, aſanem kankan akubunep afon aupasek ta agane na wa. ſai itaot ſurupaiaſ da, aſ aenta Anut aſaon da, an aſanem miai.

Murnap id tinid naon dugo tiſane wak i?

³⁵Aria, tamol ta isumiaen pe ibol, “Tamolpein dal dugo woſ kumaed fon dumasa wak i? Agod tinid naon dugo yak diſanep ate dupalu wak i?” ³⁶Oſ tamol buraarau! Oſ ulon ak, oſ mel patun pae dop man an ririan ta isa kiſaek oſ na wa. Tia, mel patun an imat gup a. Ago dop mel patun igo woſ yen yau san tia ya, tia, mel patun an sen tinin ibiliſa dop anaſ foun ak igo woſ isa wa. ³⁷Agod mel patun a oſ pae dan, murnap nuſon ago mi ſane san tia ya. Tia, oſ wit kubulan boi, tia, mel ta patun mi pae da. ³⁸Ago gug Anut inſinan ilon gubak mi dugo yen ak lo mi, mel an patun iſanep isa yaup tubun pe, inſaned naod ſenſen aſem itaot dilasa wa. Mel patun an tinid naon ſenſen ipidinaſ da. ³⁹Mudan fidian tan en lo yan naon kiſaek man tia ya. Tamolpein tinid man ſenamo ya, bor goun sad tinid dam ſenamo ya, agod anakanak inſ iy da tinidi ſenſen a. ⁴⁰Mel a keit fufo dien dan tinid muroun anda ya, agod melmel a tan na dumado dan dam tinid muroun anda ya. Ak man mel tan na dumado dan sad girager naon kiſaek a, agod mel lak na dien dan sad girager naon ſenamo ya. ⁴¹Ad man inſanen girager naon kiſaek a, ago gug kalam inſanen girager naon ſenamo ya, patui dam sad girager naon ſenamo ya. Agod patui anen anen sad girager an ſenſen a.

⁴²Aria, saen tamolpein a dumat la yan fon kumaed dumasa wan, kulob naon nek ago yan ilasa wa. Tinid e imug tan na id tiñane emaiak tisarep igan a. Tinid foun ak a murnap tiñane wan iñ fon igan san tia ya. ⁴³Tinik tan en san iñanen leil lo man siñaokan tia ya, gug tinik murna san man siñaokan geig a. Tinik tan en san iñ dabai an tia ya, gug tinik murna san man dabai anda wa. ⁴⁴Gamu id tinid man tan en san mi a, ak man saen fon kumaen tumasa da wan, id kumaen panu anen tinik tiñane wa.

Tan en san tinik yen da, an rumok tap, kumaen panu san tinik dam yen da. ⁴⁵Fun an niñen o Anut san buk lo igo digire ya, “Tamol a imug mi ilasa yan, Adam, iñ tamol kumaen ak ago ilasag imado se ya.” Ak man Adam a murna geig amaiak, sen tinin ibileksag ur ilasag imado dugo, kumaen yen yau san ipanad da. ⁴⁶Kumaen panu san tinik imug ipalu man tia ya, tia, tinik tan en san mi malmalan ilasa ya. Ago gup tinik kumaen panu san ka tiñane wa. ⁴⁷Tamol a malan te geig ilasa yan, iñ tinin man tan gufgaf san mi a. Tamol a murna ilasa yan, iñ tamol kumaen panu san mi a. ⁴⁸Tamolpein a gamu tan na dumado dan, nek ibol tamol a imug mi tan na ilasa yak igo woñ ago dumado da. Nek ago mi, tamolpein a murnap kumaen panu na dumado wan, nek ibol tamol a kumaen panu na ipalu la yak igo woñ, dilasap dumado wa. ⁴⁹Gamu id tinid san leil man nek ibol tamol a imug mi tan na ilasa yan san leil igo woñ a. Ak man murnap, tamol a kumaen panu na ipalu wan, iñanen leil dugo yen dak ago, idaned leil foun an dam naon kisaek mi wa.

⁵⁰Teig taog, ñai ñurupaiañ da, tan en san tinid man Anut san kagin panek aben lo imado san tia ya, agod mel ta imat san, mel ta imat san tia yak iñanep yabi san ta idaisuda na ya, tia geig a. ⁵¹Kududom agurep ñai ru mianuk ta ñurupaiañ o da. Id aenta ta tamat na wa, ak man id fidian tinid ibileksa wa. ⁵²Mala ipuk ikilakil dan lo, mel en ilasa kisaek oñ a. Saen tour murna geig an ibob dop, mel an ilasa wa. Man dugo, tour ibob pe tamolpein a dumat la yan kumaen dumasa wa, agod iñaned tinidi fon imat pe igan san tia ya. Ago dop id a tan na kumaen tumado dan tinid ibileksa kisaek oñ a. ⁵³Man dugo, nek ibol id kulos foun ak tiñanep tidiri dak igo woñ, idsad tinid an ibileksap tinid foun ak imat pe igan san tia yan tiñane wa. Man dugo, mel a imat san an itout yau a, ago dop mel a itout yau san tia yan ilasap pempem yen yau a. ⁵⁴Saen idsad tinid foun ak ago ilasa dop man, awak aban Anut san buk lo yen dan nuñon ilasa wa. “Anut yu igane itout a, kulob an san dabai man mateñ ituñañ pasik a.” ⁵⁵An niñen o id ka igo tabol,

“O mateñ, oñ yu gane itout an san dabai dugon te yen dak i?

O mateñ, oñane buroi an dugon te yen dak i?”

⁵⁶Mateñ anen buroi man aupasek mi a, agod aupasek san dabai man Moses san kubiañ lo yen da. ⁵⁷Ak man id Anut ilo uyan ru tupani wa! Man dugo, iñ idsad Tubun ak Jesus Kristus lo idirad go yu tigane itout a, an lo man mel an fidian sad dabai tibiai dudu ya.

⁵⁸Teig taog, fun an niŋen o aŋanem ilo rumok lo atur sakar a. Mel ta idiraŋ pe ta asuk amul na wa. Aŋ pempem aŋsem ilom tinim fidian lo urat agane wo dan Tubun ak apani wa. Man dugo, aŋ alorŋ ak aŋanem urat wagai agane dan nuŋon ta ideg yau san tia ya.

Korint adi Jerusalem tamolpein o moni dutumani san ru

16 ¹Gamu ŋai aŋ moni atumanip Anut anen tamolpein Judea na dumado dan abinawai san niŋen o ŋurupaiaŋ da. Nek ibol ŋai midaeŋ Galesia tan lo dumado dan ŋurupidaŋ ago mi aŋ dam ago agane wo ŋurupaiaŋ da. ²Ubou kisaek kisaek atem aŋsam urat naon moni an aenta sen gigin na adirip yen a. Tubun mi ŋane dop tubun mi pani wa, kabelan ŋane dop kabelan pani wa. Ago dop man saen ŋai ŋupalu dan te dop, aŋ fon moni o urat wagai ta agane na wa. ³Agod taida mi, aŋ tamol aenta fudi alorŋ uyan ak apilianai a, agod saen ŋai aŋsam na ŋupalu dan te gup, aŋsam binawek moni agane yan disinip Jerusalem na diau a. Ŋai atna Korint na ŋupalu gup, tamol Jerusalem na diau an, girek banid te tiganep disini diaup, matu gurman Jerusalem na yan, aŋsam binawek agane yan fun irupidaip duloŋ a. ⁴Go ŋaiseg dam ŋau wo ilog ibol tap man tamol an ŋai luag disap mau a.

Pol ru kagin funfun Korint adi irupidaŋ a

⁵Ŋai Masedonia tan lo ŋaup ŋamul gup, afon aŋsam na ŋupalu wo ilog yen da. Ŋai Masedonia na saen milaen ta ŋumado na wa. ⁶Agod saen ŋai aŋsam na ŋupalu dan, ŋai dap saen kitek milaen mi aŋ da tumado wa. Ŋai tim tubun ipalu dan san saen lo tumado yaup tim itout ak boi. An lo saen idaisudap ŋai aben dugon te ŋau o ŋupiliani dan, binawek an ta ŋai onte ŋau san ka apanag a. ⁷Ŋai gamu aŋsam na ŋupalup ŋiliaŋ o ilog ta ibol da, man dugo, ŋai aŋ da saen katukan mi ka tumado wa. Ak man Tubun ak ilon ibol tap, murnap ŋai aŋ da kitek saen milaen mi tumado wa. ⁸Gug gamu man ŋai igo Efesas na ŋumado yaup Judea lo Pentikos san tumanek nal ilasa wa. ⁹Man dugo, Anut ŋai dalawan ipasi panag an lo, ŋai iŋanen urat ka ŋigane uyanan mok a. Ago dugo ager tamol adi dam ŋaisag urat dututep itout o wagai digane da.

¹⁰Aria, saen Timoti aŋsam na ipalu tap, iŋ kagin apani uyan a, ago dop iŋ ata mel ta lo katukan dop, an niŋen ilon ta weiwei na wa. Man dugo, iŋ dam Tubun ak san urat nek ŋai ŋigane dak ago mi igane da. ¹¹An niŋen o aŋ luluaŋam lo talpein ta Timoti iŋane wo ta imoi na wa. Iŋ abinawi uyan ak, agop maror lo mi aganep ŋaisag na ipalu da wa. Man dugo, ŋai iŋ malan ŋiganeg ŋumado da, agod iŋsan urat kisaek adi iŋ luan disag dida dutor dan dam malad ŋiganeg ŋumado da.

¹²Aria, ŋai gamu idsad teid Apolos niŋen ŋabol da. Ŋai iŋ aŋsam na turan aenta luad isap dida dupalu wo ŋusumiani a, ak man iŋ imoi a. Murnap iŋsen nal ta kawan ak ile dugup ipalu wo ibol a.

¹³Tawan aganep amado wa. Ago dop anjanem ilo rumok Kristus lo yan mi lo atur sakar a. Ilom dabai anda amado dop dabai lo mi tamol mok amado wa. ¹⁴Urat biabi fidian agane dan ilo panek lo mi agane wa.

¹⁵Aria, an alon ak tamolpein a Stefanas san ab lo dumado dan, in distrik Akaia ilon lo malmalan ilod lo rumok a. In in sed ilod nam Anut san tamolpein dibinawaig urat digane da. ¹⁶Teig taog, fun an ningen nai nududuwan da, an tamol naok ago yan awad paen na amado wa Nek ago mi anjanem urat kisaek a fidian urat awan disini wo maeg digane dan dam awad paen na amado wa. ¹⁷Gamu saen en nai ilog uyanan da, man dugo, Stefanas in Fotunatas da agod Akaikas naisag na dupalu ya. Gidad an naom tia ya, an lo in naom dijaneg nai ilog diabisa ya. ¹⁸Tamol en nai ilo maror dupanag a, agod an dam dal nek ago mi dibinawan a. Fun an ningen o tamol naok ago yan, an yanad lak na asini san idaisuda ya.

Ru wadan

¹⁹Aria, midaen a distrik Esia ilon lo dumado dan fidian an ilo uyan dupanag da. Akwila in Prisila da Tubun ak yan an lo an dam ilo uyan dupanag da. Nek ago mi midaen a in sad ab lo dutumanig dumado dan, an ilo uyan dupanag da. ²⁰Ilo rumok adi etna Efesas na dumado den, an ilo uyan dupanag da. Saen an nug ale dop man, musuk gun ak nam nug ilo uyan apani wa.

²¹Nai Pol, gamu naiseg banig nam ilo uyan ru en ngireg an sam na nganeg ipalu ya.

²²An lulunam lo talpein ta Tubun ak ningen o ta imat na tap, Tubun en talpein an tinin fo misilaneke iganep yen ak ago nabol da. O Tubun en, on palu!

²³Tubun en Jesus in anen ilo panek an da amado.

²⁴Jesus Kristus yan an lo naisag ilo panek an fidian nupanag da. Rumok.